



Kat. Komp.
40830


Mag. St. Dr. P

1606.

Chiaberge Jos. Agn. S. J. Ora-
tiones. Latinae Editio.

Poznań. 1745. 17.

XIV. 8. 33



ORATIONES
P. JOSEPHI IGNATII
CHIABERGE,
SOCIETATIS JESU.

Tertia Editio.



POSNANIÆ
Typis S.R.M. Clari Collegii Soc: JESU.
Annò Domini MDCCXLV.

XXIV. 7. 50



40830

Iber.

¶
CLEMENTI XI.
PONTIFICI MAXIMO
ORATIO PANEGYRICA

Habita in Aula Maxima Collegii Ro-
mani Annò MDCCII.

SI GRATULATIONIS, quàm OPTI-
MO PRINCIPI tot nominibus debitam
solvimus, excusandam in præsentia tardi-
tatem arbitrarer, EMINENTISSIMI EC-
CLESIAE PRINCIPES, argumenti in
primis magnitudinem accusarem: proferrem de-
inde Romani Oratoris sententiam, negantis vi-
delicet seram gratulationem reprehendendam
videri: quòd ea minùs in adulationis suspicio-
nem vocetur quòd verior esse, ac plenior sole-
at: cum è contrario laudatio præpropera spei
vulgo plus, quàm rei afferat, & Virum magnum
promittat potius, quàm exhibeat. Verùm excu-
satio-

sationes istas à me nemo vestrum, AUDITORES, opinor, desiderat, quibus explorata jam pridem est, atque perspecta Sanctissimi Modestia Pontificis, honores, laudesque averfantis, & generosâquâdam ingentis animi indole detrectantis. Sed pace Tuâ dixerim, CLEMENS PONTIFEX MAXIME: Diu satis obsequuti Modestiae Tuae sumus. Cedas affectibus nostris, oportet. Nostrum hoc obsequii, venerationis, ac si fas dicere, amoris quaecumque tributum tandem exoratus, accipias: necesse est. Fuerit Moderationis Tuae, quod tamdiu obstiteris: ejusdem profectò esse debet, quod aliquando vincaris. Quoddam enim genus immanitatis esset, si tam grave nobis silentium, ac pudorem, quò suffundimur, juberet esse perpetuum. Pudet enim, quod tamdiu passi fuerimus silere liberales Artes, hujus Romani Lycei felices incolae, quæ primum occupare debuerant gratulandi locum. Hoc unum illis erat votum: Et quidem quale optabilius, aut æquius votum? Quàm enim decebat præclarissimas Artes, quæ Magnum Te olim Alumnum exceperant, Patronum deinde studiosissimum, mox Principem senserant, ac parentem suum; quæ ex incremento Dignitatis Tuae tantam suæ pariter dignitati accessionem factam esse intellexerant: Quàm, inquam, decebat, ut Tibi statim gratularentur ac sibi: Æquissimum erat, ut qui tantopere illas commendas, ab illis pariter

P A N E G Y R I C A

pariter commendareris. Verùm ubi sensero,
tamdìu Te invitum, obluſtantemque, non niſi
magnâ vi, ac deprecatione multâ ad ſuſcipien-
dum Orbis Catholici Regimen cogi potuiſſe,
nec ſatis poſt ſuſceptum Dignitati acquieſcere:
ingenti ſtupore defixæ, doloriſque Tui partici-
pes, quò ſe verterent, quid conſilii caperent,
ignorabant. Quid enim facerent? Gratularen-
tur felicitati Tux, quam infelicitatem Tuam
quodammodo interpretabaris? Dolorem acuit,
qui dolenti grátulatur. Gratularentur felicitati
noſtræ? Sed quæ poterat eſſe felicitas noſtra,
dolente Te? Non ſecus enim ac Tu ſine nobis,
ita nos ſine Te felices eſſe non poſſumus. Quid
itaque reliquum erat, niſi ut erumpere geſtien-
tem lætitiã gravi ſilentio premerent, atque
ab omni gratulatione abſtinerent? Quod cum
illæ facerent, jacuiſſent mœrore confectæ: niſi
probè intellexiſſent, hòc Tibi chariores eſſe:
quòd ſilerent. Quamquàm, fidenter dicam, non
omnino imperare nobis potuimus, ut ſileremus:
ſed privatim, ubi dolori, & gaudio libertas, ac
locus major eſt, certatim invicem gratulabamur:
& domesticos intra parietes, ubi nulla fingendi
neceſſitas, ſincèrò gaudiò exultabamus. Quin
etiam uſi, quâ licuit, opportunitate dicendi,
& ſcribendi, teſtatum voluimus, quid Tibi,
quid nobis deberemus. Ab hac tamen celebritate-
hactenùs abſtinaendum putavimus: ne Tibi ingrati
eſſemus

essemus, ac molesti; dum grati, & officiosi
esse contendimus. Nunc verò, cum omnium
consensus, & conspiratio vicit, ut par erat, Mo-
destiam Tuam (Nequè enim omnium Gentium
æquissimis votis, & gaudiis obistere, si velis, po-
tes; nec si possis, debes) nunc enim verò feren-
dum non esset, ac nemo nobis ignosceret, si no-
stras voces in publico isto quasi concentu desi-
derari pateremur. Nequè esset Clementiæ Tux;
si quod aliis negare non potes, quod omnes
etiam Te invitò, faciunt, nobis, ad quos præci-
pue attinet, prohiberes. Persolvimus itaque
necessarium officii vestigal, quod si minus Mo-
destiæ Tux CLEMENS, Tux saltem Æquitari
esse gratum debet. Gratissimum certè contingeret
tot sapientissimis, atque omni ex parte ornatissi-
mis Viris, quorum Ego præsentia cohonestor,
authoritate commoveor, expectatione ad dicen-
dum impellor. Quam enim sunt erga Te venera-
tione, studio, & amore, gaudent palàm audire,
quod ipsi privatim sæpè gaudent loquuntur.
Adsum igitur, vestros omnium sensus ut expli-
cem non falsus interpret, AUDITORES orna-
tissimi Dicendi argumentum à vobis, ipsa pro-
pe verba mutuabor. Mirati estis, quòd Pontifi-
catum detrectaverit? Hoc primum. Gavisi,
quòd acceperit? Hoc alterum. Gaudetis, quòd
tantà cum Dignitate, Sapientià, Virtute admi-
nistret? Hoc tertium erit, atque præcipuum

meæ Orationis caput. En igitur quibus veluti adumbratam coloribus vobis hodie propono CLEMENTIS imaginem. Magnus fuit in Pontificatu detrectando: Major in accipiendo, Maximus Est in administrando.

NOSTIS pro vestra sapientia, Auditores, quàm suaves habeat Honor illecebras, ad conciliandos sibi hominum animos, & in sui desiderium, amoremquè rapiendos. Nullum enim speciosius, nullum præstabilius inter mortalia bonum est. Sed nec mortale bonum existimaveris, quod homines ornat post funera consecrat immortalitati, Natura ipsa tacitis quibusdam igniculis, quos nobis inserit, huic ad gloriam ardori quodammodo illecinatur. Magnum quiddam Homo est: dignitatis suæ sibi conscius altum quiddam spirat: & honorem, tanquam debitum excellenti Naturæ tributum spectat. Nec illos veteres, miror, qui Honori Tempia posuerunt, Aras tanquam primario Numini crexerunt. Quanquam quid aris, quid templis opus quando huic Numini in illorum animis Heroum ambitio jam pridem aras extruxerat? Ibi humano sanguine, Provinciarum vastitate, Regnorum excidiis Idolum illud colebatur. Hinc factum, ut Philosophia illa vetus, atq; adeo vera. & Christiana Philosophia nihil majus ad hominum commendationem excogitare potuerit; quàm si quis tam forti, tam invicto esset pectore; ut Honorem contemnere auderet.

Hoc ed̄ splendidius laudavit admiratrix Heroum
 suorum antiquitas; quò paucioribus meminit
 contigisse. Hoc in Clemente quàm multi, quàm
 verè prædicarunt? Quàm nemo hætenus tamen
 laudavit satis, ac miratus est. Quantum enim,
 quæso. illud est, quod repudiavit? Illam nimi-
 rum Dignitatem, quæ vicariam sustinet Supre-
 mi Numinis Majestatem. Quæ vota quàmlibet
 ambitiosa Honor iste non implet, ac superat?
 Hominem, an Deum putas, quem in Aris ipsis
 coronandum locari, quem in Religionis quasi
 Domicilio, in Orbis Catholici Arce constitu-
 tum vides? Indè sacras leges Populis, & sancta
 jura distribuit. Si Thronum ascendat, strata
 humi Regum Majestas pedes deosculatur? leges
 audit, fulmina perhorrescit. Si jubeat, audiunt
 Nationes universæ, Cælum ipsum obsecundat,
 Tartara contremiscunt. Paucis accipite supremi
 hujus Honoris imaginem. Sublimis Tartara pe-
 dibus calcat; alterâ manu Orbem Terrarum com-
 plectitur; alterâ Cælum attingit, ac pro libito
 claudit, reseatque. Quàm magni est animi, De-
 us immortalis! Honorem istum obtinere cum
 possis, non quærere; cum merearis, non cupe-
 re; cum sponte ab omnibus deferatur, strenuè,
 ac fortiter derestare;

Sed erunt aliqui fortasse, qui Honorem aditu
 primò respuant, quasi ejus inopinatâ luce perstri-
 cti. Erunt, qui ne ambitiosi videantur, fugiant
 obla-

oblatum decus: sed non procul, non diu, non
 constanter: eatenus dumtaxat, ut famæ consu-
 lant suæ: ut præter ipsum Honorem, Modestiae
 quoque laudem assequantur. qui honoris cu-
 mulus est, callide ambitiosi, modeste superbi, su-
 perbe demissi. Clemens diu, constanterq, talena
 se præbuit, qualis inirio visus erat. Quàm erat
 optandum, ut ad Religionis nostræ splendorem,
 ac pompam in quodam proponi potuisset uni-
 versi Orbis Theatro speciosum illud, ac trium-
 phale certamen. quod in arcanis Comitiorum
 penetralibus peractum est: ubi tres integros di-
 es, non ut magnum aliquod pararetur Imperi-
 um, sed ut augustissimum in Terris imperium
 detrectaretur, hinc à Purpuratorum patrum se-
 natu, inde ab unius constantia acerrimè pugna-
 tum est & de regnandi cupiditate utrimque glo-
 riosissimè triumphatum? Merebantur, quid efere-
 bant, vel hoc ipsò, quod Tanto pares Imperio,
 in alterum transferre certarent, reluctantem co-
 gere niterentur: perinde ac si beneficium am-
 plissimum ipsi potius accipere viderentur, quàm
 dare. Tu verò, qui à tot maximis Viris, ac me-
 reri se, quod dabant, conscis dignissimus, at-
 què Optimus deligebaris, Clemens merebaris
 procul dubio jampridem oblatum decus. Iterum,
 ac magis promeruisti, cum illud constanter adeò,
 ac magnificè detrectares. Sed iterum, & tunc
 maximè promeruisti, cum repudiatam fortiter

8 O R A T I O .

Dignitatem fortissimè suscepisti : ut verè tunc beneficium amplissimum non Tibi datum ab omnibus, sed à Te datum fuisse omnibus, constet.

Videas enim interdum homines, qui ab Honore capiendò refugiant, sed conscientia imbecillitatis, quia pares oneri splendido non sunt, aut inertia, quia onus horrent. Clemens verò, & onus vidit, & humeris non impar vidit, impositum ut perferret, à se ipso fortiter impetravit. Adeò ut, qui magnum se Pontificatu detrectando exhibuerat, maiorem se probaverit accipiendo. Rectè hoc, & sapienter, nec sine certo Divinae Providentiæ consilio videtur comparatum esse: ut honores oneribus, onera verò honoribus temperarentur: ut honorum cupiditatem onerum molestia compesceret: onerum gravitatem honorum jucunditas recrearet. Utrisque constant splendida munera, honoribus juxta, & oneribus. Hoc tamen interest, quòd honores ostentantur, onera dissimulantur. Blandum quiddam, & insidiosum Honor est: non statim ostentat onera, quæ tercant, sed Dignitatem, quæ placeat. Utramque Honoris, blandi & severi; læti, & molesti, placidi foris, intus tumultuosi faciem Clemens vidit. Detrectavit lucem, blanditias, splendorem: Onera, molestias, tumultum, & curas accepit.

Quàm est onerosum, Deus Immortalis! impos-

Impositam velut humeris ferre totius Orbis molem : Europam, Asiam, Americæ, atque Africæ remotissimas gentes Paterno sinu complecti: admittere in animum omnium curam populorum: omnium pericula, infortunia, calamitates suscipere: oblitum sui Orbi Christiano vivere: de tot Urbibus, & Nationibus, & Provinciis in vera Fide, in pace, & concordia continendis diu noctuquæ cogitare: accipere innumerabiles undiquæ Nuntios, totidemque dimittere: sollicitos dies, ac vigiles noctes pro omnium salute, ac felicitate transigere adversus tot hæreses, superstitiones ac vitia contendere: spectaculo esse mortalibus universis, quibus rectam præbere vivendi, sentiendique normam, ac regulam tuis ipse legibus, tuis moribus debeas; Tot septa laboribus Dignitas an non merito debebat nonnullâ honoris pompâ circumvestiri: ut honos onerâ vel dissimularet, vel solaretur; Si enim totam repentè se proderet curarum hæc moles; quem tantæ magnitudinis virum existimamus fore, qui suos supponere humeros vellet? Sapienter itaque Christiana Respublica, dum dignitate gravissimâ Pontifices onerat, honores veluti quoddam pietatis tributum atque vectigal, non quidem necessarium sanctissimis Viris, æquissimum tamen, persolvendos statuit, ad laborum solatium, onerum levamen, & lenimentum curarum.

Verùm concipite animo, Auditores, Heroem

ali

aliquem, supra mortalium conditionem excelsitate ingentis animi sic evectum: ut nihil extimā captus rerum specie, ac fulgore, Pontificiæ Dignitatis onera curas, laboresque omnes penitus introspiciat, & immensā quādam mentis amplitudine complectatur: Eā insuper sit firmitate, & constantiā munitus, ut quantum ad promerendos honores meriti afferat, tantum ad eos contemnendos roboris habeat; nihil ab eorum specie, ac illecebris permoveri se, aut incitari patiatur. An eum aliquando tantam onerum molem subiturum putamus? Si faceret: quem Illum esse, quā magnitudine animi prædictum putaremus;

At Quis heros Ille, quem cogitastis: Clementem profecto, auditores, intellexistis à me sub herois istius imagine rudi adumbratum. Omnes ille tantæ Dignitatis labores, onera, & curas capacissimæ solertiæ mentis deprehenderat. Quin usu ipso, atque experientiâ rerum Magistrâ tanti Honoris jugum, tanti servitutem Imperii, tantæ Felicitatis ærumnas satis superque didicerat Cum tunc tribus Pontificibus Maximis in sustinendo Ecclesiæ Orbe suppetias ferret, tunc oneris gravitatem tanti sensit. Quā enim erat existimatione, Authoritate, Sapientiâ, atque in consiliis capiendis dexteritate, nullus incidit nodus, ad quem solvendum, atque enodandum quæsitus iste non fuerit Alexander. Szpé in rebus difficillimis,

consilium, sententiam, præsidium rogatus in ea penetralia introire consueverat. ubi latentes explicat, ingentesque ingens felicitas labores, angustias, curas.

Adde novum istis pondus: perturbationes præsentium temporum, calamitates, bellorum incendia, quæ Europæ universæ imminere jam tum sentiebamus omnes, perspicacissimo Ille mentis obtutu intuebatur. Navim regendam conscendit, non cum Cæli serenitas, ventorum favor tranquillitatem, & securitatem promitterent; sed cum ingentes ubique atrolli fluctus, sævissimas circum undique impendere tempestates videret, Quæ nunc non sine dolore cernimus, jam Ille cogitatione præverterat: Imperia se invicem collidentia; in mutuam ruentes perniciem armatos Reges, ac principes; populorum clades, Urbium solitudines, vastitates agrorum, Regnorum tumultus: Religionis neglectum, metum, pericula... Sed nolo, auditores, Europæ faciem tristissimam vestros ob oculos ponere: ne pietati, ac dolori vestro nimium indulgeam, Quanta, rogo Magnitudinis fuit, sapientem animum, nullis honorum illecebris delinitum, tot, ac tanta hujus, Imperii onera planè perspecta suscipere;

Sed nondum satis de susceptis oneribus dixi, postremum addo modestæ menti longè gravissimum. Quid illud? honorem ipsum, quem tantò Clemens abhorrentis animi nisu propellere à se, ac de-

ac deprecari contenderat. Hunc subjisſe nōne fuit majus. quā repudiāſſe? Ut enim repudiāres, Clemens, repellendæ Tibi erant honorum illecebræ: ut exciperes; ipſa honoris detrectatio, honore ipſo ſplendidior, veluti retractanda; atque in Honore tam fortiter; tam ſapienter rejiciendo velut obfirmatus animus expugnandus Moderanda ibi honoris cupiditas: hic ſapientis animi demifſio, ac virtutes, quæ lucem fugiunt, ſuperandæ Sapientia hortabatur, ut ſperneres, Moderatio, ut recuſares: hoc ipſum ne acciperes, Animi tui Magnitudo, Conſtantia, & Modestia ipſa, ſuadebant. Modestiam accipiendō ſuperasti, Conſtantiam viciſti, Magnitudinem cumulasti. Animum renuendo viceras: eundem iterū, jam ſui victorem, jam ſe ipſo majorem admittendo, atque impositi oneris triplicem quaſi molem, tribus Gentilitii ſtemmatis Montibus adumbratam, ſuſtinendo viciſti.

Dicam tamen. Auditores, quod ſentio. parū eſſet Honorem probè cognitum detrectaſſe: parū etiam perſpecta onera ſuſcepifſe: niſi eadem pari cum laude perferrentur. Accedat hic laudi Tuæ cumulus: Clemens pontifex Maximus. magnum te probaſti honore detrectando: maiorem accipiendō: At maximum gerendō, et adminiſtrando te probas. maximum, inquam, quia Dignitati maximæ parem.

Reliqua munia, principatus, Imperia ſuos habent

habent fines, certosque magnitudinis terminos; quos mentis, ac virtutis præstantiâ transilire quodammodo, & prætergredi possis, & suscepto munere, atque honore major videri. Sed ubi ad eam Dignitatem deveneris, quæ, Vicariam Dei potestatem apud homines gerens, sublime Cælo inserit caput, nullisque Imperium videtur limitibus definire. Huic profectò qui se administrando parem probaverit, supremum ille attigisse Magnitudinis apicem dicendus est. Qui enim major excogitari animus possit, quàm qui tantum æquaverit Dignitatis fastigium, quò majus excogitari non possit? Sed quando potestatem utramquè Principis, & Pontificis maximi Dignitas ista complectitur; Illum ego administrando parem existimandum censeo, qui omnia impleat Optimi Principis, ac Summi Pontificis munia Quæ quidem quemadmodum Clemens cumulatissimè impleat, non vobis, auditores, quibus compertissimum est, sed posteritati universæ comprobatum volo, Principis est, subditorum sibi populorum Felicitati consulere: summi Pontificis, immortali mortalium omnium Felicitati prospicere. Utrumque ita Clemens præstat, ut omnium vota spesque impleverit.

Et primò quidem publica illa Felicitas, quæ principis munus est, tribus planè conficitur: pacis tranquillitate: an non & aliarum id genus rerum copia: bonarum artium cultu. Primum en-

enim, ut sine metu vivamus? Alterum, ut com-
modè: postremum, ut honestè, ac laudabiliter,
Tria hæc simul colligata, complexaque ut felici-
ssimè vivamus efficiunt. Quam hujus triplicis bo-
ni, & felicitatis partem nobis optandam reliquit
Tanti principis Virtus, providentia, & Felicitas:
Nimirum inter circumstrepentes bellorum tu-
multus otio jucundissimo fruimur: Inter laboran-
tes inopiâ populos, omnium rerum copiâ abun-
damus: & quæ plerisque in locis jacent Optimæ
Artes, apud nos imperant, vigent, triumphant.
satisne illud mirari, vel potius gratulari nobis
possumus, quòd Europâ universâ bellorum in-
cendiis æstuante, sola Nostri principis Ditio pa-
cis obtinet securitatem? Ejus confinia si prætere-
as: latè respersos cruore campos intueris, strata
passim cadavera exhorrescis: plurimis ubiquè
imaginibus morris, ac terroris occurris. Si pedem
territus referas, suavissimo frueris pacis aspectu,
Circumundique obstrepit armorum fragor, tu-
barum clangor: præliantium clamores, morien-
tium gemitus exaudiuntur. Hic silent omnia &
cùm prælia, & clades nunciantur, quantum de
aliena calamitate dolere, tantum de felicitate
nostra gratulari compellimur. Quis tantam
sibi tranquillitatem polliceri ausus esset, cùm
atram illam, collectis undique nubibus, & præ-
gnantem fulminibus tempestatem, Italiæ incu-
bantem videret; hic & illic sævissimè detonan-
tem audiret? Spem quidem ingentem serenitatis

fecerat exortum Clementis Sidus. Multum præsidii in Authoritate, quam illi suprema Dignitas fecerat, par Dignitati Virtus cumulaverat; multam in ejus prudentiâ, quâ rerum eventus longè prospicit. & mirâ dexteritate antevertit; multum denique in eâ, quâ est apud omnes existimatione, apud Reges, ac principes veneratione, & gratiâ, multum, inquam, in his omnibus ad tranquillitatem præsidii statuebamus. Sed cum effrenatam belli suâptè naturâ sciremus esse licentiam; sperabamus, non sine aliquo metu ne in proximo sæviens bellicus furor, & circumvolitans turbo, nos etiam abreptos in partem calamitatis involveret.

Ademisti nobis hunc metum; Princeps optime. Spes nostras cumulasti, Serenitatem pacis, tranquillitatem, securitatem tenemus. Iram bellî coercet Authoritas Tua; frenos imponit licentiæ furori terminos statuit. Totâ pene bacchatur Italia procellosum Bellum; diras ubique tempestat, horrida parit naufragia. Sed ubi ad Ditionis Tuae fines devenerit, Tuum quodammodò sentit Numen, tumentes fluctus confringit, litora deosculatur, atque in se revolutum, complicatumque decedit. Hanc belli metam, ac legem discordes licet invicem reges, ac principes, unanimi tamen consensu statuerunt. Eâ nimirum Magnitudinis Tuae admiratione, Virtutis reverentiâ eorum animos occupasti, ut offensionem Tuam

quam

quancumquè pejorem qualibet clade arbitrentur: eâ devinxisti benevolentia: ut amorem Tuum omni victoria potiolem putent. Ex hac insidiis inter se dissidentium Regum, ac principum in Te uno sincerè amando concordia, sperare in primis pacis, quâ fruimur, perpetuitatem jubemur: Tum etiam confidimus, orituram inde Italiz, atque Europæ universæ optatissimam pacem sui procurandæ tot curas impendis, tot preces ad Superos; tot lærymas fundis. Sed dum illa speratur, quantæ felicitatis est, quòd nos eâ præsentè lætamur? Quanta hæc principis gloria, qui nobis illam suis ipsius curis, laboribus, sumptibus comparavit?

Quis enim tranquillitatem in hac perturbatione temporum difficillimam nullo nobis statutam impendio sperasset? præsertim cum videremus, obtutandos Imperii fines communiri arces, novos conduci milites, tot Legatos, ac Nuncios ad principes mitti, tot denique impensis à principe pacis securitatem parari? Jam sublevare de nostro Ærarii difficultatem cogitabamus omnes, nec inviti: Commune commodum scilicet privato singulorum incommodo bene redemptum arbitrati. O nos supra expectationem felices! nihil oneris impositum populo. Nemo jussus est publicam felicitatem detrimentò suò sancire. Totam hanc, quam tenemus, pacis securitatem nobis optimus princeps suis comparatam laboribus,

laboribûs, suis nutritam inpendiis, liberalissime fruendam donavit. Pacem habemus magnis sumptibus partam: nec tamen inde pauperiores sumus. Unus pauperior factus est, princeps. Sed ne ipse quidem, gratulari enim sibi jure potest suum esse, quod omnium est.

Jam quanta felicitatis nostræ pars est, quod in hac temporum difficultate commodissimam nobis annonæ affluentiam, & rerum omnium copiam facit? Solet annona, non præsentis modò, sed etiam futuri tempore timore ingravescere; quin & alienæ, ac præsertim proximæ sterilitate regionis carior fieri, ac durior. Sed Tua, Clemens. Providentia, atque in omnia intentus nostræ felicitatis amor, & cura maturè præcavit ne præsentis obesset futuri temporis metus; quin ut præsens copia futuri temporis metu depelleret. Nec alienis nos conflictari calamitatibus passus es: sed eam insuper omnium rerum abundantiam, & copiam suppeditasti; ut exterorum etiam penuriæ populorum solatio esse possit. Sed non modò Tuorum necessitati consulis, verùm etiam splendori Urbium, atque ornamento.

Testes Trajani Aquæductus Centumcellis à Te, ingenti operâ, ac sumptu, priori Magnificentiæ, & commodo restituti. Quibus exultasse gaudiis Centumcellanos existimamus, cum repente salientes peregrinas aquas viderent, quæ

lato murmure obstrepentes, eò quò poterant modò, pollicebantur illis certissimè commodius commercium, frequentiores advenas, fœcundiores hortos, uberiores opes, & confirmatam clarissimæ Urbis, ac Portûs cum dignitate felicitatem? Quàm festivis acclamationibus tanti Auhores muneris salutavêret Innocentium XII, quòd strenuè inceperit, Clementem, quòd constanter profectus absolverit. Uterque enim an illis, uterque à me in hujus consortium laudis appellandus est Princeps. Nè que enim verendum est, ne quod alteri adscribimus, invidere alteri videamur. Non eum habemus Principem- qui suas augeri alienis laudibûs ferat; sed qui suæ pariter laudis prædicationem oderit, & alienæ silentium damnet; hóc laudabilior, quòd suæ laudis negligens laudari alterum gaudet. Commendandus itaque Innocentius, quòd dignam Principe optimo provinciam suscepit: & licet ille non satis ad rem perficiendam vixerit; satis tamen ad beneficii laudem vixit, quòd perfecturus, si licuisset, inceperit.

Sed indè commendabilior es, Clemens, quòd in egregiis operibus, atque immortalibus, non incipientis gloriam aucuparis; sed si quid ab aliis Principibus ad utilitatem publicam commodè atque magnificè inceptum est; in id constanter insistis: & alienam laudem negligendo non invades, sed amando, ac promovendo Tuam, vel
nolens

nolens, facis. At quàm Tibi peculiaris, in tanto persequendo, & absolvendo opere, laus celeritatis, atque Constantiæ? Jam enim laboris, ac sumptûs magnitudo in hac Ærari, ac temporum difficultate, Spes nostras, ac vota in commodius tempus distulerant. Quid à Te jam optare, quid sperare, Clemens, non liceat, si quæ nobis utilia sunt, licet difficillima et maxima celerius præstas, quàm nos optare audeamus? Quam de Magnitudine Tua opinionem studiosi advenæ induent? cùm intelligent. Anno tui Pontificatus secundo, eo videlicet anno, quo tot labores, & curas complexus, jactatam bellis Europam componere, Imperii tui tranquillitatem, magnis sumptibus nullisque imperatis tributis tutari studebas impensè, hoc, inquam anno munera istiusque ad antiquitatis invidiam magnificentissima, à Te liberaliter data? Sed hæc ludentis quasi Magnificentia, ac Populorum commodis consulentis opera sunt, Præstantiora, atque illustriora videamus

Bonas Artes videlicet, animorum decora, virtutum nutrices, Reipublicæ ornamenta, ac præsidia, Sapientiâ, Auctoritate. munificentiâ intantum promover, auget, amplificat; ut Clementis Principatus Optimarum Artium Regnum appellari meritò possit. Quando enim illis par honos habitus? Quando major in illarum Lyceis frequentia, sedulitas, ardor? Ut omnes, siquæ

indecorò torpebant otio Academia excitantur,
& alacritate novâ vigent! Ut omnium extimu-
latur ingeniorum vigor, solertia exacuitur, stu-
dia inflammantur! Ut denique artes præclaræ
omnes spiritum, ac vitam splendoremque accepê-
re! sub eo videlicet Principe, qui omnes ita in
Se Uno complectitur, ut ferè excellat in singulis.
Testantur egregia ab eo edita Græcæ, Latinæ at-
que Etruscæ facundiæ monumenta. Testatur hæc
Musarum Domus, Clemente, Alumno quondam
suo, superba: ubi tot Ille, ac tanta præstantis in-
genii documenta, & eruditionis dedit.

Lyceum istud intraturos ducemus per loca
singula, quæ ingens Alumnus, atquè Hospes
implevit: omnium memores, indicesquè dice-
mus. Hic olim Clemens Græcæ, ac Latinæ fa-
cundiæ Tyrocinia posuit: Hic Eloquentiæ rudi-
menta capessivit: Hic Naturæ penetralia subri-
lissimè scrutabatur: Illic sacras literas, altissi-
maquè Divinitatis Mysteria incredibili, naturam
omnem prætervolantis ingenii celeritate, asse-
quebatur. Hic disertissimè perorantem, hic
Philosophica, hic Theologica arcana explican-
tem sapientissimè acerrimèquè propugnantem
accepimus. His artibus ille utilissimè pueriti-
am instituit, adolescentiam constantissimè exer-
cuit: juventutem pulcherrimè excoluit? Pro-
vectiorem ætatem copiosissimè locupletavit. O
dignum hoc apice supremi honoris Principem,
qui

qui nunquàm sibi, nunquàm suis commodis, nunquàm cupiditatibus vixerit; sed ætatem omnem in studiis, vigiliis, curis traduxerit Quid ad conciliandum bonis Artibus amorem, & cultum excogitari præsentius, atque optabilius possit; quàm Princeps, illis ab ineunte deditus ætate & earum beneficio summa omnia consequutus? Quis dubitet, maximi ab Illo faciendos, ei probandos præ cæteris, qui easdem præclaras Artes, ejus exemplo, coluerint?

Sed quos insuper Authoritatis aculeos addit, cum Testis Ipse, Ipse æstimator, Ipse laudator accedit? Quos habent stimulos, quos animos, ac vires faciunt voces istæ? Sciet Clemens, æstimabit, probabitquæ. Sed non tibi satis, Clemens, qui non laudare tantum bonarum Artium cultores, sed ornare muneribus soles. Huc enim præcipuè Munificentiam Tuam impendis; ut præstantissimas Artes ornes, augeas, ac dices. Has Magistratibus administrandis, fungendis Legationibus, gubernandis Provinciis destinasti: & exturbatâ velut è folio Fortunâ, quæ regere, ac moderari hominum sortes vulgò solet, Felicitatis quasi arbitras esse bonas Artes jubes. Quàm præclarè, quàm splendide, quàm foeneratum, quod ab illis acceperas, beneficium rependis? Illæ Te dignum Principatu fecerant, Tu illis Principatum donas.

Est itaque cur gratulari temporibus nostris

meritò debeamus: quæ nobis eum paravêre Principem, qui Felicitatem publicam in Pacistranquillitate tutissimam, in rerum omnium copâ latissimam, in bonarum Artium cultu honestissimam, in omnium complexione cumulativissimam procreârit.

Verùm civilis ista Felicitas umbra quædam, & imago est immortalis Felicitatis, ad quam comparare nos, ac veluti manuducere Supremus Pastor, ac Pontifex debet. In hanc ergo Clemens toto pondere consiliorum, totoque nisu mentis incumbit. Huc præcipuè Summi Doctoris Sapientiam, Pastoris Optimi Vigilantiam, Sanctissimi Pontificis Authoritatem confert: ut ad Divinarum Virtutum studium, quæ sunt beatissimæ semina felicitatis, mortales omnes inflammet.

Huc illæ cohortationes pertinent, quibus reflorescere pristinam eruditorum Pontificum facundiam gratulamur. Quantam Illæ spirant, quàm solidam, nativamque Pietatem? Quæ sermonis gravitas? Quæ vis? Quæ majestas? Quàm aptè congruentibus sacrarum Literarum oraculis confertum, ac dives eloquium? Quàm instructa ad docendos, quàm efficax ad permovendos animos eloquentia? Quàm digna hæc Summi Ecclesiæ Doctoris cura?

Jam ut Pastoris Optimi, atque amantissimi omnium Parentis Vigilantiam exhibet, partest-
que

partesque omnes cumulatifſimè implet Producere hîc tot ſanctiſſimas Leges, ab eo ſancitas, vel confirmatas. quibus Sacris Templis reverentiam, Feſtis diebus cultum, rebus Divinis frequentiam reſtituit: Intemperantiæ modum, Licentiæ frenos impoſuit: Rectæ puerorum inſtitutioni, Judiciorum æquitati, omnium denique Ordinum integritati conſuluit. Celebrarem expurgatum Prædonibus Latium. Proferrem tot circumquaque miſſas, plenas conſilio, Pietate, & Sapientiâ Literas, quibus hîc concordiam inter Principes aluit: illic Religionis integritati conſuluit, alibi reſurgentis Hæreſeos, & perturbatione temporis ad renovandos errores abutentis audaciam retudit. Tot Legatos recenſerem ac Nuncios, qui per Orbem Univerſum, ad remotiſſimas uſque Sinarum plagas, Paſtoris, optimi Vigilantiæ circumferunt.

Sed quid longinqua Vigilantiæ Paſtoralis exempla quærimus. cùm domeſtica, cùm recæntiſſuppetant? Revocate in memoriam, Auditores tempus illud . . . Horret animus meminiffe Sed quando ſecura eſt præteriti periculi recordati- quandoquidem, quod in noſtram perniciem imminere iudebatur, malum in tantam publican utilitate Dei Immortalis beneficio. & Clementis Vigilantiâ converſum eſt meminiffe nos decet, ne felicitatis noſtræ, atque accepti beneficii videamur immemores. Revocate itaque in animum

Auditores, si tamen obliterari unquam potuit funestissima illius imago temporis, cum Terra intestino tumultu concussa, domos nostras, quasi pondus invisum excuteret! cum inconstans, ac fluctuans titubare experiremur sub pedibus sortum: ruentibus similes nutare parietes; crepitantia tecta diffringi; suspensas ubique, ac præcipientes ruinas intrare? præsentem undique intuenti mortem intueremur. Fugiebamus huc illuc incerti, metu exanimes, & pallida viventium simulacra. Ubique præsens periculum, præsens ruina, præsens mors occurrebat. Quid enim usquam satis tutum; ubi solum illud, quo cætera stant, ac nituntur, labat? tum verò fugam perdidit timor, fuga perfugium.

Verùm, quod communis Parens Tellus perfugium negabat, in Clemente Parente Optimo invenimus. Hujus profectò Vigilantiæ debemus, quòd tanto defuncti metu, ac periculo sumus. Quid enim omisit laboris, & curæ: ut afflictam Urbem, & consternatam erigeret: ut periculi causas, & periculum ipsum averteret? Post primam Urbis trepidationem, Orationem habit ad Sacri Collegii Purpuratos Patres, unius noctis vigiliâ elaboratam; sed eâ curâ doctinâ, & pietate conscriptam, ut nemo illam audiret, aut legeret, quin Pastoris Summi Vigilantiâ admirabilem prædicaret. Nequè hoc satis. Statim referavit Cœlestium donorum Ærarium: ut

immo-

immortalitatis arrhâ donatis non modò metus minueretur, sed mors ipsa propè esset in votis. Indixit publicas preces, supplicationes, jejunia, In singulis ferè Templis tot Pietatis exercitationes instituit, ubi certatim omnes de placandâ Numinis indignatione, deque confirmandis adversùs pericula, mortem que ipsam animis cogitaremus. Immensâ Orationis effer, non dicam exornare dicendo, sed vel narrando persequi tot excogitatas Artes pulcherrimas, sanctissimasque: tot sapientissima opportuni ssimaquè consilia, in ea rerum perturbatione tam celeriter, tam constanter, feliciter ueq suscepta.

Improvitus ingentis preiculi metus adèd occupare, ac perturbare animos solet, ut rebus gerendis, capiendisque consiliis minùs habiles, atque imparatos efficiat. Testes ipsi sumus, qui tam præsentis periculi metu perculsi, de nobis unicè servandis solliciti, non aliena tantùm, sed nostra etiam obliviscebamur. Tu interim, Sanctissime Pontifex, Tui unius oblitus, de nobis omnibus cogitabas. De omnibus verò? Quin & de singulis. Quod enim hominum genus, quæ natio, quæ tam abjecta conditio Tux Vigilantiæ curas effugit? Singulos hominum ordines, gradus: officia diligentissimè recensebas: pro singulorum salute, utilitate, solatio, quàm plurima opportunissimaque mandata expediebas: perinde ac si, secretò quòdam cum Divina Mente com-
merico,

commerico, quæ acciderunt mala, mente jampridem & cogitatione prolpexisses, atque olim per otium tot consiliorum molem digessimus.

Quæ digna satis hujus Vigilantiæ prædicatio? Quæ par illi esse possit grati animi significatio? Eavidelicet luctuosissimi illius temporis calamitates in gratulationis materiem convertit: & nostra ipsa pericula invidenda posteris fecit. Adeo enim repentino timore excitatam Romæ Pietatem confirmavit, cumulavitque; ut nulla in posterum felicior, ac dulcior futura sit? quàm tanti periculi recordatio, quæ in omnium salutem, Pastoris optimi curâ felicissimè redundavit. Enim mverò quando Pietatem vidimus in hac veræ Fidei Arce gloriosius triumphantem? Quando tam frequens, tam assiduus ad Tempia concursus Quàm accuratum, quàm constans rerum divinarum studium? Quàm, profusa in pauperes liberalitas? Quàm denique singularia virtutum omnium ac præsertim difficillimarum certatim, ac palam data ab omnibus documenta mirati, & gratulati sumus? Quid memorem interdicta in posterum Bacchanalia, & scenicos ludos? Quid vana luxus ornamenta proscripta? Quid sanctiorum in futurum sacra, supplicationes, jejunia? sanctiorem denique vivendi normam decretam ab omnibus, ac firmiter constitutam?

Non hæc Timor præstat, quem haud satis idoneum, atque diuturnum novimus officii Magistrum.

gistrum. Habet ille satis unde gloietur, atque superbiat, quòd tanti occasio fuerit Boni: Authoris laudem præcipuam Vigilantiæ Tuæ concedit, Sanctissime Pontifex: sed, & amor omnium rega Te sincero, qui Tibi placere, Te imitari ac sequi studebat. Præibas enim omnibus exemplo, qui omnes hortabaris verbo Vidisti, Roma, Christianæ Pietatis monumenta religiosissimè invisentem: sacros gradus Reparatoris nostri cruore respersos positis humi genibus numerantem? ut quot pietatis osculis Dignitatem deprimere, totidem gloriæ gradibus videretur attolli Vidimus, non humeris hominum, non currum invectum, non equo insidentem, sed ægrè, propter debilitata recenti morbo crura, pedibus nitentem, moliri viam plurimo infectam luto, atque imbriferi Cœli inclementiam detecto capite dissimulantem incedere. Ibat immixtus circumfusæ supplicantium Turbæ, solâ corporis proceritate ac pietate spectabilior: quæ quantum se reliquis immiscere studebat; tant supra reliquos eminebat. Vidimus Apostolorum Principis Templum lugubri pompâ adeuntem, ubi sacris operari tantâ cum Majestate, ac Religione consuevit. Jam inter illos Urbis terrores, atque discrimina illacrymabatur alienis periculis. Intereâ sui securus, Orbe concusso, rebus Divinis constantissimè instabat: & novus Moyses in suum potius converti caput precabatur mala, ut eadem à Populo deprecaretur: seque Ipse Summus Sacer-

Sacerdos pro Populo victimam offerebat. Hæc tanti Pontificis Pietas, Tibi, Roma, ad pietatem incitamento. ad securitatem præsidio fuit: & si tot circumjectis Oppidis, Urbibus, Provinciis ingenti clade vastatis. aut telluris haustu præcipiti absorptis, stas, Roma, soluta metu, & periculo, Pietate auctior, Clementis Pierati debes.

Sed non eam ego Pietatem tantummodò, quam eo calamitosissimo tempore, sed quam semper præferulit, loquor, Quin enim unquam nobis Ille exequendum proposuit, quod non Ipse prior sui exempli Authoritate firmaverit, Quam legem sanxit, quin eam ipse sibi prior indixerit? Quam Virtutem nobis commendatum voluit, de qua priori pse luculentissima documenta non dederit? Si Liberalitatem in pauperes, atque eos præsertim, quibus illa Terrarum clades adeò parùm pepercit, ut unâ duntaxat Vitâ superstitie fortunas omnes abstulerit, eam Clemens, licet jam penè exhausto, Ærario Principis imperaverat. Si Temperantiam, & Frugalitatem, quis eo frugalior, qui de quotidianæ mensæ sumptibus ita detraxit, ut Privatorum, ac plebejorum Civium mensas Principis mensa non vincat? Sæpè nos ad omnia Christianæ Pietatis officia cohortatus est. Sed ut se in omnibus præbuit exemplar, An non expiandis criminibus publicè aures præbentem; egenorum pedes Pontificiis manibûs abluentem, in Nosocomiis agris fercula, morientibus

entibus immortalitatis pharmacum ministrantem aspeximus?

Quis continere lacrymas potuit, cum videret Pontificem Maximum ad Aras accedentem juxta Optimi Fratris Filiam immortalis Deo in perpetuum consecraret? Illam, amore Tuo dignissimam, cum propter eximiam virtutem, & singulares dotes haberes charissimam, Clemens, Magnæ profectò Fortitudinis fuit, quòd à Te divelli permiseris: Majoris, quòd heroicum Virginis consilium approbaveris: Maximæ, quòd tam novo spectaculo interfueris. Quid, quòd eo vultu interfueris, quò genialibus nuptiis interesse homines solent? Quid etiam, quòd incruentam, ac purissimam Victimam Tuâ veluti manu immolaveris, Idem Ipse Sacerdos, & penè Victima?

Hæc sanè dum præstas, Imaginem Pontificis Maximi exhibes, quam demirari quidem universa cogetur Posteritas, utinam imitari contendat, Oneras futuros Principes, Clemens: sed & Postereros nostros. Isti enim, quòd non eadem fortasse præstari videant? Illi quòd eadem præstare non sine ingenti difficultate possint graviter ferent. Sed hoc utrisque solatium esto: quòd meliora sortientur tempora, quæ nec tantæ Virtutis, ac Magnitudinis Moderatorem postulabunt, ejusque desiderium facilius ferent. Quando enim diuturno experimento comperimus, hunc

hunc esse Divinæ in homines Providentiæ morem, ut pro ratione temporum Orbi Catholico Moderatores sufficiat: Nostra hæc tot inter se complicatis pressa calamitatibus tempora Moderatorem planè Maximum postulabant.

Quæ Cum Ita Sint: erit ne, qui adulari me putet, cum Eum in administrando Pontificatu Maximum appello, quem constat, ita omnia Optimi Principis, ac Summi Pontificis munia cumulatissime implere: ut Supremæ Parem Dignitati se probet? Non id à vobis, Auditores, percunctor, quorum ego novi suffragia, sensus intueor. Sed eritne alius fortasse quispiam, quem à vobis, atque à me dissensurum putemus? Erit? Est procul dubio, atque is unus est, qui ueclamantibus cæteris omnibus Clementem Supremæ huic Dignitati administrandæ imparem putat, ac præicat. Quis Ille? Clemens Ipse: Clemens unus Clementem imparem putat, ac veris lacrymis profitetur. Laude Clemens, quamvis allentiri non possim. Felix error, qui Te commendabilior nos feliciores facit Quid enim felicius nobis; quid per se præstabilius, quam Princeps, ita pariter Magnus, ac Moderatus, qui separem probet, imparem putet? Quæ vota de felicitate nostra suscepit Optimus Princeps, & Sanctissimus Pontifex qui cum nos Pacis Tranquillitate, Rerum Omnium Copia, Bonarum Artium Cultu felice effecerit, cum tot Sapientiæ documentis, tot Vigilantiæ conatibus


tante

tanto Authoritatis incitamentos tam studiosè,
tam esollicitè, efficaciter immortalì Omnium feli-
citati pro spiciat? adhuc tamen non satis, quod
suum est, se præstare arbitratur


Quò majores nos decet immortalì Deo gra-
tias referre: quòd talem nobis Principem, ac
Summum Pontificem dederit: illudque enixis
precibus flagitandum assiduè, ut diu servet, ac
de nostris etiam Ipsius annos augeat, Ipsius con-
silia, & vota secundet, atque impleat: ut Quem
Virtus Magnum In Detrectando Pontificatu,
Maiorem In Accipiendo probavit; In Admini-
Strando Maximum, non Virtus tantummodo, sed
Imperii diuturnitas, & cumulatissima,

quam meretur undecumque
felicitas, probent.

D I X I.



INNO-



INNOCENTII XII.

PONTIFICIS MAXIMI

PROVIDENTIA.

ORATIO FUNEBRIS.

RECTORES hominum nulla magis commendat virtus, quàm Providentia. Est enim isthæc Regalis planè ac divina Virtus, quæ publicæ Præses felicitati, reliquas omnes sibi administras habet comitesq; virtutes: adeò ut Una hæc, Reges, ac Principes imperiò dignos, ac regimini pares ostendat. Quamobrem Summus Pontifex, qui Vicariam in terris Dei Majestatem præsefert, & Catholici Orbis curam, ac regimen suscipit, hâc potissimum laude excellat, oportet: atquè ut parem Se tanto muneri præbeat, parem Dignitati Providentiam exhibeat, necesse est. Id unum qui faciat, Pontificem se verè maximum probat, Fecit

Fecit Innocentius XII. quem in hâc funeris pompâ non tam lacrymâs prosequi debemus, quàm laudibûs. Providentiam ille, quâ nulla excogitari angustior, nulla diviniore potest, in Summi Pontificatûs administratione & Catholici Orbis regimine exhibuit: Illius videlicet Imaginem Providentiæ, quâ rerum omnium opifex Deus Orbem universum moderatur, ac regit. Hanc sibi perpetuò contemplandam, imitandamque arbitratus, id tam gloriose ac feliciter præstitit; ut eas ipsas, in se imitando converterit, sibi que peculiares effecerit, dotes, quæ Divinæ Providentiæ omnino peculiares ac propriæ, totam spirant Divinitatem, atque admirationem potius à nobis, quàm imitationem exposcunt. Nihil de Summo Pontifice, nihil de Innocentio prædicari majus potest. Hoc itaque Orationis meæ argumentum. Innocentius Duodecimus in Summi Pontificatûs Regimine Divinæ Providentiæ Imaginem absolutissimam præbuit: Cum peculiare aptus Divinæ Providentiæ Dotes, Pecunares Providentiæ Suæ laudes effecerit.

Enimverò. Tria præsertim sibi peculiariter, ac propria vendicat Supremi Nominis Providentia. Primum, quòd ita rebus omnibus providet; ut ab iis utilitatis nihil, aut detrimenti suscipiat. Alterum, quòd ita rebus universis intendit, ac si vacet à singulis; atque ita pari-

ter intendit singulis, ac si vacet ab universis. Tertium denique, quod præsentibus intenta in futurum prospicit, atque omnibus unà simul temporibus provider. Primum Divinæ Infinitatis est, alterum Immensitatis, postremum Æternitatis. Cùm enim Deus per se se infinitus sit omnium bonorum Oceanus, cui nihil addi possit, aut demì: ut nihil jacturæ ex perpetua in res omnes creatas derivatione bonorum, ita nihil utilitatis potest ex earum gubernatione percipere. Et cum eâ. quâ omnia implet, Immensitate, toti Mundo (ut cum Romano Philosopho loquar) insertâ, rebus omnibus totus, ac totus singulis intimè præsens, atque insertus sit; tam facillè providere omnibus, quàm singulis potest, seque non tam in magnis magnum, quàm in minimis maximum exhibere. Denique cum interminabilis vitæ totâ simul; perfectissimâque possessione perfruatur, & è quadam veluti Æternitatis suæ speculâ atates omnes, ac tempora unico intueatur obtutu; Unus simul omnibus providere temporibus potest. Cum tam peculiare istiusmodi sint Divinæ Providentiæ dotes, cum totam spirent, atque præseferant Divinitatem. Quis unquam putasset, inveniri posse tantæ magnitudinis Virum, qui eas ipsas referre, atque æmulari contenderet: Idque ita re ipsa præstaret: ut peculiare Providentiæ suæ laudes

des efficeret? Præstitit Innocentius, qui, Divinæ veluti particeps Infinitatis, nihil sibi utilitatis, sed & detrimenti nihil ex tam diuturna Catholici Orbis gubernatione suscepit. Divinæ veluti socius Immensitatis, ita universis intendit, ac si vacârit à singulis; atque ita pariter intendit singulis, ac si vacârit ab universis. Divinæ veluti coævus Æternitati, dum præsentibus intenderet, in futurum providit, ac subsequantium sæculorum felicitati prospexit.

Quod quidem ne à me temerè dictum quis putet, singula per suas partes conficiam. Ac primum ajo, atque affirmo, nihil sibi utilitatis Innocentium ex Summi Pontificatûs vel redditibus, vel commodis, vel honoribus suscepisse: Iis contentus opibûs, quas secum ad Principatum tulit; quas per tot regiones, cum Præfecturas, Legationes, aliaque amplissima munera obiret, circumtulit; quibus apud Reges, ac Principes, ac Cæsarem ipsum singularem sibi existimationem, benevolentiam, venerationemq; conciliaverat; quibus demum Summi ipsius Pontificatûs apicem adeptus est: Innocentiâ, videlicet omni ex parte integerrimâ, Magnanimitate, Moderatione, Charitate, aliisque omnibus virtutum præditiis, atque ornamentis: Hîs, inquam, opibûs abundè dives, nihil sibi ex ærario Principis, nihil ex redditibus

bus Pontificiæ Dignitatis adscivit. De suo vivere solitus, ac paternæ hereditatis sumptibus mensas instruere: Atque ut eos ipsos privatos redditus in publicæ utilitatis tributa converteret, in quotidiana vivendi ratione eam sibi frugalitatem indixit: ut privatorum civium mensas Principis mensa non vinceret: Adeò ut nihil inter privatum interesset, ac Principem; nisi quòd moderatior Princeps, ac frugalior videretur, atque hoc major, quia melior. Cum tantâ Principis abstinentiâ moderatio in corporis cultu certabat. Moderatio dico? an potius, novum in Principe decus, Paupertas? Vidisses Pontificem Maximum obtritatus, ac penè laceras vestes Pontificiæ Dignitatis insignibus dissimulantem: Adeò ut dum majestatem Dignitati parem præferret exteriùs; interiùs Paupertatem foveret Dignitate ipsâ chariorem.

Noveras, sapientissime Pontifex, magnas habere opes Parsimoniam Principis, eamque perennem esse publicæ utilitatis fontem. Hinc tanta Sæculo tuo annonæ copia; ut agris ipsis fecunditatem fons hic attulisse videretur. Uberrimam certe liberalitati, ac magnificentiæ Tuæ materiem suppeditavit. Ut minùs jam mirer tot effusus opes, quàm in sublevandis pauperibus, quàm in redimendis captivis, quàm in remittendis oneribus, quàm denique in extruendis

endis tot elegantissimis fontibus, atque erigendis tot augustissimis molibus, quæ antiquitatis memoriam revocant simul, obruuntque. Cum tot largitiones, ac munera, usque ad ventilitatis invidiam, munificentissima à Te liberaliter data perpetuò contemplanda se objiciant; haud satis scio, quid commendare magis, ac demereri universa Posteritas debeat? An tot molitricem operum Magnificentiam? An tot largitricem munerum Parsimoniam?

At enim. Qui nihil sibi ex Pontificii Patrimonii Redditibus, num aliquid ex tantæ Dignitatis commodis sibi usurpandum putavit? Adeò semper negligens sui, & patiens laboris; ut planè constet, sola onera Imperii ab Eo esse suscepta. Nunquam sibi vacare: assiduam suæ copiam adeuntibus facere: somnos brevissimos capere: tam denique nihil de valetudine, nihil de sublevandis tanti muneris curis, ac laboribus cogitare; ut ex quo Principem induit, se hominem esse videretur oblitus. Nunquam tamen oblitus se esse mortalem, honestissimam illam, quæ ab honore percipitur, animi voluptatem mortis cogitatione, quodam veluti felle aspergebat; ut ne hunc quidem utilitatis fructum, seu potius laborum solatium, ac lenimentum curarum ex tam onerosâ Dignitate susci-
peret.

Documento est Sepulchralis Urna, quam vel

ab ipsis Imperii sui incunabulis Sibi extrui iussit: ut exuvias, non tam perituræ mortalitatis post funera conderet, quàm peremptæ cupiditatis multò ante funera tumularet. Quàm sapientis animi est, in summa fortuna mortis cogitationem, adeò fortunæ honorumque illecebris adversantem admittere? In supremo rerum humanarum fastigio, extremas conditionis humanæ vices, & fata meditari? Inter acclamationes Populorum, quibus vita nunciatur, ac diuturna promittitur, mortem cogitatione prævertere? In eâ demùm Dignitate, quæ proximè ad Divinitatem accedit, se mortalem agnoscere; nec mortalem tantummodò, sed moriturum: nec moriturum duntaxat, sed jam suis cupiditatibus mortuum comprobare?

Piget hìc Imperatoris Græci meminisse, qui cœnare fictilibus, atque aureis vasis lutea immiscere consueverat: ut Se Patre figulo genitum recordaretur, quò minùs Regali Dignitate intumesceret. Quantò sapientiùs Sanctissime Pontifex, cùm nihil humile à nobilissimis Parentibus Tuis hauseris, cùm nihil non augmentum, in recensendis Avorum tuorum imaginibus ac præclarissimis gestis deprehenderes; ut animum tamen, in supremo illo Dignitatis apice moderareris, atque dmitteres, in Templo totius Orbis Principe, ubi terrestre Dei solium conscendis, sepulcralem Urnam, Tuis conden-

dis

dis cineribus sacram statuisti? Ut quoties Ædem illam augustissimam, ad obeundas Dei vices, ac divinos excipiendos honores, ingredereris, toties visendus occurreret tumulus, qui Te hominem esse admoneret, atque honorum finem, quò faciliùs contemneres, præmonstraret? Sed non injucundum erit, opinor, Auditores, molem hanc, Sibi à munificentissimo Principe extructam diligenter intueri. At hoccine, Deus immortalis! Hoccine, inquàm, Summo dignū Pontifice, dignum Innocentiō Mausoleum? Breve, atque humile saxum, rudi operâ levigatum, simplici titulo inscriptum, nullis asperum signis, nullis ornamentis conspicuum! Addeò nimirum Te ipsum neglexeras, Sanctissime Pontifex; ut vel ab ipsa negligi posteritate exoptares! Intantum honores contempseras; ut eos etiam, qui sequuntur funera, detrectaveris, omnes, si posses, detrectaturus. Pulchriùs fortasse existimabas, in Posteris tuis affinibus, quàm in lapidibus vivere.

Cùm enim Nepotes quædam sint Avorum, suorum Imagines, in quibus superstites vivimus; eos præcipuè curamus felices efficere, quò in illis feliciùs vivamus. Eos ideirco studemus augere opibus, ornare muneribùs, insignire titulis: ac nobis ipsis datum, quod illis impendimus, arbitramur. Quid ergo Innocentius, cui tam uberem copiam, ad locupletandos, ex-

tollendosque Nepotes suos, vel Dignitas, vel Patrimonia suppeditabant? Quid, inquam, illis largiendum, aut impertiendum putavit? Citò dicam: Nihil. Videlicet non sibi satis sui videbatur oblitus, nisi etiam suorum oblivisceretur. Neminem sibi sanguinis affinitate conjunctum, hoc nomine, augendum censibus, aut Dignitatibus præficiendum existimavit. Atque hoc maximè à se haberi ut suos ostendit: quòd ita cum illis agendum putavit, ac secum: & qui profusissimè in reliquos liberalitatem, severissimè in Suos paupertatem exercuit. Nimirum, ut cum suis duntaxat commune haberet Decus illud eximium ac suum: Nihil utilitatis ex tanta Dignitate suscipere.

Magnum id profectò ac planè Divinum; quòd ex tantæ Dominationis opibus, commodis, honoribusque, nihil unquam in Sui, aut Suorum derivaverit utilitatem. Sed non satis divinam imitaretur Infinitatem: nisi pariter dum nihil utilitatis in se, suosque derivat, detrimenti nihil passum esse constaret. Quid enim? An ideò pauperior factus est Innocentius, quòd Ærarium Principis in publicam utilitatem effuderit? Pauperior non est, qui propterea nihil habet, quòd donat omnia. Non est fons ullus aquarum egentior, quòd eas jugi quodam lapsu, ac celeri perennitate profundit. Nec ullâ parte luminis diminutus est Sol, ex quo

quo totus explicari mortalibus cepit. Quin hoc maximè dives Innocentius, quòd Se unum pauperem esse pateretur, ut omnes divites faceret. Cùm enim eâ, quâ indigentes charitate complectebatur, omnium calamitates in suas converteret, sibi dabat, quòd omnibus dabat. Et cum amore illo, quò invicem redamabatur ab omnibus, Parentis amantissimi locò haberetur; gloriari meritò poterat, suas esse opes omnium, & singulorum. Quid quòd vel ipsi sapientiores veteris Philosophiæ Doctores, eum verè divitem esse constanter statuebant, non qui haberet multa, sed qui cuperet nihil: & qui paucis contentus, paucis indigeret, eum Diis simillimum nuncupabant, cum Deos nullius rei indigentes, atque adedò *r' aon a gontas*, idest facillimè viventes appellare consueverint. Hòc itaque verè dives Innocentius, quòd sibi cuperet nihil: Hòc Deo simillimus, quòd quàm-paucissimis contentus facillimè viveret; quàm-paucissimis indigeret, ut omnia indigentibus daret.

Sed & hòc etiam Beatior, quò publicis curis, & laboribus gravior Se omninò negligeret, ut Se totum in commune bonum impenderet. Magno videlicet, ac sapienti Viro ex ipsis laboribus, pro publica felicitate susceptis, jucundissima quædam promanat voluptas, quæ ad novos suscipiendos labores alacriorem sem-

per,

per, atque in iis perferendis latum, ac beatum facit. Hinc inexplebilis illa novi semper aliquid ad publicam utilitatem moliendi cupiditas, quâ vehementius in die flagrabas. Sanctissime Pontifex: adeò ut, cum tot, ac tanta præstiteris, Unus tamen nunquam satis quod Tuum est, Te præstare arbitrareris. Testes hinc appello, vel ipsas lacrymas tuas, ac doloris voces.

Jam senio gravis Innocentius, augustâ proceritate, ac mole corporis gravior, pedum fallente vestigio, periculoso lapsu, resupinus humi ceciderat. Eo ruente, omnium spes, & gaudia simul ruere visa sunt. Amantissimi periculo Principis marrens, & consternata metu ad Pontificias *Ædes* Civitas universa confluxerat. Quid interea Innocentius? Cum videret omnium luctum, dolorem, & lacrymas; cum populi gemitus, & suspiria exaudiret; Quid interim Ipse, qui lugebatur? An non lugeret? An non doleret casum suum, quem nemo non dolebat? An non lacrymaretur, quod omnes lacrymabantur? Indoluit, lacrymatus est: sed non casum suum indoluit, non ingravescentis morbi cruciatus, non præsentissimum ipsum mortis periculum. Id omne constanter dissimulat. Sui ut solebat, securus ac negligens: omnia fortiter, atque alacriter perfert. Unum dolet, & lacrymatur. Quid illud?

illud? Audite pulcherrimi doloris voces, & causam. Quid hætenus, inquit, in publicam utilitatem contulimus? Quid hucusque fecimus? undè hunc casum Civitas tam graviter doleat? Hæc ille cum diceret, obortis, ac spontè fluentibus lacrymis perfundebatur. O voces! O lacrymas optimo dignas Principe, optimo dignas Pontifice, dignas Innocentio! Instantum scilicet in sustinendis Tanti Imperii oneribus, in tot magnorum operum exantlandis laboribus delectabare, Sanctissime Pontifex; ut ad ea, quæ majora in dies moliebare, animum semper, ac vires intenderes, atque omnia simul perferre exoptares! Adeò prætorum oblitus; ut postquam Orbem jam universum tuis ingentibus factis impleveras, postquam remotissimas gentes Magnitudinis Tuæ admiratione conjunxeras, nihil tamen Te præstitisse existimares, idque veris lacrymis profitereris: Id unum Tibi, in tam gravi morbo, in tanto vitæ discrimine, causam doloris, & lacrymarum afferret. Hæc una scilicet doloris materies, cui una est gaudii materies, bene de omnibus promerendi labor.

Jam verò, quæ in paupertate divitias, in laboribus gaudium invenit; Quid in honorum contemptu? An aliquam honorum jacturam passum esse credamus? Cum sciamus, eam esse honoris indolem, atque naturam; ut non se-

cus,

cus, atque umbra, corpus, sequentes fugiat, fugientes sequatur? Hòc sanè honoratior Innocentius, hòc summis honoribus major, quòd summos honòres contempserit. Hòc Ille Augustior habitus, hòc Divinior; quòd in tam augusta Dignitate, in tantâ Divinitatis specie Se infra mortalem mortis cogitatione demitteret. Hòc denique toti Posteritati commendabilior, quòd à Totâ commendari posteritate neglexerit.

Tuam illam sepulcralem Urnam (Præsentem enim alloqui videor Innocentium, qui omnium præsens erit memoriæ sæculorum) Tuam, inquam, sepulcralem Urnam, quam ideò tam exiguam construxeras, ut intuentium oculos fugeret; ideò tam humilem, ut penè contemptui haberetur, demirari universa Posteritas, suisque laudibus in Cælum efferre non desinet. Jamque non Urnam vocat, sed Arā. Videre videor Apostolorum Principis Templum invisentes Advenas, nunc universa, nunc singula illius Aedis miracula, ac tot Summorum Pontificum Monumenta studiosissimè perlustrantes. Quàm dispari tamen admiratione, quàm diversis affectibus Tuum, ac reliqua contemplantur? In illis sumptus magnificentiam, lapidum pretium, operis elegantiam mirantur. In Tuo gloriæ contemptum, atque animi Tui Moderationem, omni magnificentiâ grandiorē,
omni-

omnibus pretiosorem lapidibus laudant. Ibi Artis, hinc Virtutis miraculo stupent. In illis herent jucundius; utilius in Tuo. Inde voluntatem hauriunt, hinc Pietatem. Illa denique mirantur, adorant Tuum. Faciet Posteritas univ[er]sa: & lapidem illum Tuis sacrum exuviiis si quando consumet Veritas; nova semper in omnium mentibus cordibusque monumenta, non Tuis cineribus, sed Tuis Virtutibus sacra consurgent.

Quid denique, quod eam ipsam, quam neglexisti, in Tuis obtines immortalitatem? Cum ne ipsis quidem conditio deterior acciderit, quod Tuo erga illos amoris nihil indulseris. Accessit enim illis hanc potissimum causam major quidam honor, ac reverentia. Tua haec penè incredibilis Virtus, quae Majorem Te, atque Admirabiliorem, Majores illos pariter, atque Admirabiliores facit. Hoc magis honores illis deferre certamus: hoc magis mereri praedicamus, quod eos à Te non acceperint. Hinc sapientissimò sanè consiliò, Clemens, Pontifex Maxime, Franciscum Pignatellum, Innocentii Virtutes, ac merita, non tam sanguinis cognatione, quàm morum imitatione attingentem inter Purpuratos Patres adscribere festinasti: Id ipsum testatus, meruisse jam pridem, qui ab Innocentio deligeretur; hoc magis mereri, quod ab Eo praetermissus. Cum itaque

que optimum Præsulem, plenum suis, & Innocentii meritis onustum videres; ratus nihil esse, quod non mereretur; nihil omittere studuisti: quò Tuæ erga Tantum Pontificem venerationi, ac Pietati: erga illius Consanguineū, præstantissimum Virum, existimationi, atque amoris: quò demum Utriusque meritis faceres satis. Idcirco vel in ipso Tui Pontificatus exordio, Primum omnium delegisti: seorsum ab omnibus inaugurasti: Ad Eum Fratris Tui Filium misisti, qui Dignitatis ferret insignia. Denique quod Innocentius gloriose omiserat, gloriosius implevisti.

Tibi verò, Cardinalis amplissime, quanto majorem cessit in gloriam; quò honestissimam Dignitatem à Clemente susceperis, quam ab Innocentio merebare. Majus quiddam fuit ab Innocentio novum hoc beneficii meritum accipere, quàm beneficium. Vivet itaque in Te Domestici Generis Gloria Innocentius, atque eò felicius vivet, quò minùs videtur consuluisse Felicitati Tuæ.

En itaque, Auditores, quemadmodum Innocentius XII., qui nihil Sibi utilitatis, nihil Suis ex tanti Imperii, ac Dignitatis administratione percepit: ut nihil etiam Sibi, nihil Suis detrimenti ex tanta abstinentiæ, ac moderatioris severitate susceperit. Primam illam assequutus tam Peculiarem Divinæ Providentiæ laudem,

laudem, quæ supremi Moderatoris Infinitatem arguit, ac præfert. Jam ut alteram ejusdem Divinæ Providentiæ laudem, quam Immensitatis suæ beneficio sibi vendicat Supremus Mundi Governator, & Rector, quòd ita se totum universis impendat, ac si vacet à singulis; atque ita se totum impendat singulis, ac si vacet ab universis; in se imitando transcripserit Innocentius, Sibique peculiarem effecerit, videamus.

Primum enim Quicumque susceptas ab Eo curas, & res gestas amplissimas æstimando recenseat; in eam profectò cogitationem deveniet: ita semper Optimum Principem, Maximumque Pontificem se totum publicis rebus, & communi impendisse felicitati; ut non modò feriri à singulis, sed vel à seipso vacare cogeretur. Quid enim unquam, ad felicitatem publicam, vel præparandam, vel sanciendam pertinens, tam fuit abditum, ut latere; tam arduum, ut deterrere; tam laboriosum, ut fatigare Tanti Pontificis Providentiam potuerit.

Ut prima veluti jaceret fundamenta felicitatis, abigendas primùm esse populi calamitates, atque ejusdem commodis consulendum putavit. Statim Annonæ caritatem diminuit: haud ita multò post ejusdem peperit vilitatem. Vicies quinquies centena aureorum millia ex vectigalibus populo indulxit. Quin immensâ
propè

propè vi pecuniarum in pauperes distributâ, suam Ipse vectigalem populo fecit Liberalitatem. Jam ut subditorum Sibi Populorum commodis abundè prospiceret, quàm sapienti consilio, quàm regali sumptu, novas ad Ripam Tiberis porticus, novas ædes, ad mercium asportandarum facilitatem extruxit? quò commodior ab Urbe Româ ad reliquas Principatus partes commeatus fieret, ac liberius ab Imperii corde reliqua membra calorem, ac spiritum, per Tiberis venas, haurirent. Quin etiam, ut remotissimas Terras toto mari divisas cum sua Ditionis finibus, ad mutuam utilitatem, connecteret; Antii Portum non modò instauravit, amplificavitque: sed eâ insuper majestate, ac specie exornavit: ut Nationes exterarum utilitate permoveat, pulchritudine alliciat, admiratione percellat. Illud verò quàm totam præferens veterum Imperatorum magnificentiam, quòd Trajani Aqueductum vetustate jam ob-
 rutum pristinae utilitati, ac Dignitati reddere instituit: Ut Portus celebritati, populorum commodis, agrorum fecunditati, Regni affluentiae consulere! Hæc tam illustria, aliaque id generis multa Regalis Magnificentiae monumenta, quædam felicitatis, quàm moliebatur, initia, ac fundamenta extitere.

Noverat scilicet Sapientissimus Princeps quòd non Philosophorum Principis tantum, sed
 omnium

omnium sancitum est consensu sapientium: non commodè solum, atque magnificè, sed præsertim rectè vivere, veram esse felicitatem: atque eam demùm felicem esse Rempublicam, in qua bonæ leges vigeant, boni mores colantur. Eò propterea Innocentius præcipuas Providentiæ curas convertit, ut legibus honorem, moribus adderet probitatem.

Vagabantur quodammodò in Urbe incertæ Leges, ac Magistratus: plurima passim hospitia, nullum uspiam par dignitati domicilium habebant: Adeò, ut, quoties ad dirimendas lites consulenda erant Judicia; hùc, illùc ferri Clientes, & in Urbe Roma peregrinari oporteret, donec Innocentii Providentiæ amplissimam omnibus Curiam à fundamentis erexit: tanta operis magnificentiæ, ac majestatis, ut vel ipsas Principis Ædes non æquet modò, sed vincat. Nimirùm ut intelligerent omnes, non minorem Legibus reverentiam deberi, quàm Principi: & sub Innocentii Regno, non tàm Principem regnare, quàm Leges.

Abundè, ac magnificè legum dignitati provisum est. Nunc morum integritati providendum. Fecit vigilantissima Tanti Pontificis Providentiæ: & primò excisis, atque sublatiis publicis scânis, quæ longo abusu, tandem in corruptelas morum desciverant, ac lenocinia vitiorum. Haud satis scio, magisne, ac laudabiliùs

bilius publicæ felicitati provideris, Princeps.
 Optime: vel cum ad augendam legum majestatem, molem illam tam splendide, magnifice-
 que adornari; vel cum ad evertendas vitiorum
 machinas, theatra publica everti, tam fortiter
 constanterque imperasti. Indè intelleximus,
 quanto in honore à nobis habendæ essent Le-
 ges, quas tanto Ipse honore prosequere. Hinc
 intelligimus, quantò à Nobis odiò habenda sint
 vitia, quæ tantò Ipse odiò insectaris. Quis
 non vidit, quàm severus peccantium animad-
 verfor futurus esses, qui vel ipsis peccandi oc-
 casionibus adeò vehementer irascebare? Quàm ut
 omninò inexorabilis adversus sectatores vitio-
 rum, qui nunquam exorari potuisti; ut vel
 ipsis parietibus, inanimis vitiorum testibus, par-
 ceres? Aequissimum utrumque, ac Tuum: & na-
 quòd nec virtutem sine præmio esse pateris, nec in-
 vitium sine supplicio

Sed quorsum tam infestum Te pravis mori-
 tibus exhibebas; nisi, ut iis depulsis, bonos in-
 veheres, ac foveres? Sustulisti vitiis domum,
 ut virtutibus dares. Occurrunt passim intuen-
 tibus ampla, & magnifica Domicilia, & Colle-
 gia, Tuis Imperiis, ac sumptibus, quæ popula-
 ribus, quæ liberalibus artibus erecta: ut & Ro-
 mana plebs, & Juventus ingenua, ab otii sinu
 divulsa, non artibus tantum Reipublicæ utili-
 bus, sed præcipue moribus optimis excoleretur.

Verum

Verùm ex hac legum reverentia, & morum institutione, civilis quædam consurgit felicitas; quæ licet Optimi Principis Providentiam cumulatissimè impleat; non tamen omnes explet Summi Pontificis partes, quem non Reipublicæ tantum, sed Religionis præsertim felicitati prospicere oportet. Atquæ huc semper Innocentius toto Providentiæ conatu, toto pondere consiliorum, totoque nisu mentis incubuit: ut Religionis cultum, quàm maximè intenderet, & quàm latissimè amplificaret.

Quid memorem demptas Paræciis pensiones, ut in Templorum decorem, & cultum converterentur? Quid instructas domos, atque amplissimò censu dotatas: ut rerum cœlestium meditationibûs excolerentur animi, atque ad divinarum virtutum studia inflammarentur? Quid nec instauratam Clericorum disciplinam, atque iis erecta, vel confirmata Seminaria: ut sacris ritibus, ac sanctissimîs moribûs, Religionis magisterio, imbuerentur? Quid denique, quod præcipuus Ipse Religionis cultor, omnes in Te uno virtutes complexus, Tuus ipse, non tam consiliis; quàm moribûs, omnium mores formabas? Vita enim Principis censura est, eaque perpetua. Ad hanc dirigimur, ad hanc convertimur; ut propè unius moribûs omnes vivamus.

Sed quò flagrabas Religionis Zelò, non satis ducebas; si ejus cultum intenderes, nisi etiam

toto Orbe extendere nitereris. Hic verò, quam ingens mihi se aperit dicendi campus, si angustia temporis ferrent? Quam enim orationem exposcerent tot excogitata consilia, tot effusæ preces, & lacrymæ: ut dissidentes invicem Christianos Principes, optatissimæ vinculô pacis, connecteres: ut sociato fœdere, adversus Catholicæ Religionis hostes, arma converterent: iis bella gererent, veros habitura triumphos. Tot ad falsis deditas Numinibus Gentes, atq; ad incognitas Terrarum plagas, expeditiones imperatæ: ut Providentiæ Tuæ, Orbem utrumque perlustrantis beneficio, mortales omnes, si fieri posset, ad Orthodoxæ Fidei notitiam, & cultum, atque ad spem immortalis felicitatis excitarentur. Tot demùm administrata subsidia: quæ Regi Hispaniarum, ut Hæreticorum in America Insulas ad Religionē labefactandam irrupētū, impios conatus comprimeret: quæ Britannia Regi; ut in spem restituendæ in Angliam Religionis foveres, aleres, ac sustentares. Quis non videat, Providentiam Tuam ita semper in promovenda, quæ Reipublicæ, quæ Religionis felicitate occupatam; ut nedum de singulis hominum rebus, sed vel de Tuis ipsis cogitare vix posses?

Sed quem ita universis intentum vidimus, ac si vacârit à singulis; nunc ita singulis intentum videbimus, ac si vacârit ab universis: adeò ut
divi-

divinæ veluti æmulus Immensitatis, ubique Se totum reddidisse præsentem videretur. Totus nimirum, quâ in pernolescendis, æstimandisque singulorum meritis, quos Reipublicæ, ac Religionis ministerio præficeret; atque in iis perpetuò regendis, ac moderandis, quos muneribus publicis, dignitatibusque præfecerat: Totus in privatorum hominum, ac præsertim egenorum repellendis calamitatibus, ac procuranda felicitate Innocentius occurret.

Sapienter docet Philosophorum Princeps, Providentiam in Summo Reipublicæ Moderatore Architectonicè, ut ait, inesse oportere; eamquæ præcipuè in optimis deligendis, optimèque regendis rerum publicarum Administris consistere. Idipsum nobis contemplandum exhibet, vel ipsa Supremi Numinis Providentia, quæ non modò generales causas, ut vocant, aptissimos veluti publici boni Ministros, Elementa, Solem, ac Stellæ creavit: Verùm etiam eos perpetuò movet, ac regit: eorumquæ operibus singulis Præsens, suas Ipsa manus, ac vires accommodat. Hoc idem Divinæ Providentiæ æmulator, Innocentius, sibi peculiare fecit, ac proprium.

Enimverò. Quàm singularis isthæc sapientissimæ, constantissimæq: Providentiæ Tuæ laus est, Sanctissime Pontifex, quòd optimos Tibi, Reipublicæ, ac Religionis Ministros adsciveris?

Cum enim per omnes, ac singulos gradus, ad supremum Dignitatis culmen ascenderis: cum Præfecturas, Provincias, Legationes, omnia deniquè unus munera obieris: noveras procul dubiò, quales, & quâ virtute præditos viros unumquodque minus exposceret. Adeò ut arcano, ac singulari Divinæ illius Providentiæ consilio, quæ Te jam pridem ad Orbis Catholici regimen, felicitatemque formabat, contigisse crediderim: quòd, dum ea, quæ in dies cumulabas, amplissima in Sedem Apostolicam meritâ eminentiores Dignitatis gradus Tibi certissimè pollicebantur, abrupto veluti honoris cursu, ad Aletinam regendam Ecclesiam, inopinatò diverteres. Ut nimirum per omnia exercitus Christianæ Reipublicæ munera, nihil discendum haberes tempore docendi. Et quâ eras mentis solertiâ, omninò pariter noveras, qui tales essent, quales à muneribus postularentur. Quin etiam, ut ea ipsa, quam ab incunabulis hauseras, mentis sagacitas diuturnò experimentò acuere-
 tur: Etruscos, Teutonas, Sarmatas Legationibus adiisti: Teque ad omnes ferè Nationes perlustrandas circumduxit Christianæ Reipublicæ Numen: ut eorum virtutes, quos eras publicis muneribus præfecturus, visu ipso dignoscere inciperes: & cum deligendi essent, Te ipsum adhiberes Testem meritorum, Tuos oculos Ipse consuleres, atque ab ingenti illo vacares Prin-
 cipa-

ad m ia ul os r- ia ci le a- ra nè , i- is m is f- n s, e- us - - - e -
ciparâs malo: necessitate credendi. Totus
propterea in recensendis, comparandisque sin-
gulorum, quæ probè noveras meritis, id unum
spectans, ut Numinis Gloriz, & Reipublicæ u-
tilitati consuleres, adeò constanter statueras ani-
mo tuo, optimum quemque deligere: ut nua-
quam potueris cujusquam favore. studiis, aut
precibus flecti, ut quemquam præligeres, quem
non mereri magis existimares. Imò invictis-
sima isthæc Providentiæ Tuæ constantia ita per-
specta omnibus erat; ut nemo eos Tibi com-
mendare auderet, quos non optimos esse con-
faret: Cùm scirent, neminem à Te optimum
ignorari, neminem probari, nisi optimum, posse.

At enim, ubi optimos communis boni Cura-
tores, & rerum publicarum Ministros desegeras:
ideòne quiescendum Tibi aliquando, aut feri-
andum putabas, publicæ felicitatis securus, ac
Tuæ? Non satis quod Tuum est Te præstare
arbitrabaris, nisi eos perpetuò regeres, ac mo-
derareris, atque eorum Virtutem tuâ Ipse Vir-
tute adjuvares. Quos consilii gravitas, ac
Prudentiæ maturitas paulò tardiores faciebat,
Tuâ Ipse alacritate, ac zelo incitabas. Contra
verò, quos generosa quædam animi indoles, ac
tuendæ Religionis, aut Justitiæ ardor paulò
fervidiùs rapiebat, Tua Ipse Benignitate, &
Clementiâ temperabas. Adeò non consiliorum
tantummodò, sed & Virtutum tuarum partici-

pes efficiebas; ut Te quodammodò in illos infundens, Te in illis reddidisse multiplicem videreris. Illorum comitiis frequens aderas: non tam ut autoritate præesses, quàm ut præstò esses auxiliò. Aderas operibus ipsis; ut eorum laborem, ac studium, & tanquam exactor intenderes, & tanquam particeps, lociusquè relevares.

Non semel vidimus, ætate jam gravi, longa itinera conficientem, ut iis præesset operibus, quæ tam diversa, & tam multa, pro commodis populorum, & communi utilitate imperaverat. Ibat Pontifex Maximus, privato penè cultu, paucorum comitatu, sine pompa, sine supercilio: ac totus ad humanitatem compositus, singula inquirere, inspicere, singulos alloqui, hortari; atque ad operis celeritatem, ac studium, lato aspectu, comi sermone, & paratis muneribus excitare gaudebat, ac penè suâ Ipse operâ impellere, securus Majestatis, ac Magnitudinis suæ.

Sed qui tam sollicitam de inanimis operibus, quantò sollicitiorem Ille de nobis curam suscepit? Adeò faciles omnibus aditus, clementiam exorabilem, atque obviam præbebat humanitatem; ut unusquisque non tam Principem alloqui, quàm Parentem putaret. Singulorum calamitates, quamquàm iis miserans indoleret: tamen ut illicò sublevaret, audire gestiebat: adeò ut nemo non se singulariter diligì à Principe,

eipe, ac sibi speciatim provideri ab Innocentio arbitraretur. Non illum negotiorum quotidiana moles, non interpellantium assidua multitudo, non ipsa valetudinis imbecillitas, quæ senio gravem, & annis fessum, extremis vitæ mensibus, afflictauit, impediēbat, quò minùs, & aures patientissimas commodaret adeuntibus, & instaret, ut quæ faciēda mandaverat, optatos ad exitus perducerentur. Unum dicam, omnium laude celebratum, & posteritatis memoriæ præcipuæ meritò consignandum.

Paucis, antequàm supremum diem obiret, horis libellum supplicem obsequavit ac ratum esse jussit, quò nummorum aureorum millia quadraginta redimendis captivis assignabantur. Factum benè, Sanctissime Pontifex, quòd vinculis exire corporis non ante volueris, quàm tot miserorum vincula solveres! Tum, credo, lætus, & alacer in libertatem beatæ immortalitatis excessisti. Afferentur in Urbem aliquando, & spectabuntur appensæ Tumulo Tuo, quas fregisti, catenæ, & hæc liberalitatis Pontificiæ miracula, à Te, etiamnum spirante edita, in præclaris Tuis facinoribus, non ultimum obtinebunt locum. Pretiosa captivi olim ferri rubigo melius, ac splendidius, quàm aurei Principum torques, & gemmata sepulcrorum ornamenta, rutilabit.

Egenos præsertim quò Providentiæ studiò:
Deus

Deus immortalis! quò charitatis ardore complexus est! ut cognomentum illud, quod sibi proprium Divinus Spiritus vendicat, sibi proprium Innocentius adscripserit: Pater Pauperum haberi ab omnibus, & nuncupari meruerit. Et sanè erga orbatos parentibus liberos, Parentem Se Innocentius optabiliorem exhibuit. Iis magnifica Hospitia à fundamentis extruxit, ac perpetuo censu ditavit: non tam ut honestè alerentur, quàm ut artes sibi, ac Reipublicæ utiles discerent, ac præcipuè moribus optimis educarentur.

Sed parùm adhuc Tibi, egenorum Parens amantissime, eorum calamitates deellere; nisi etiam participes redderes, felicitatis Tuæ, ac eorum inopiam, vel ipsis divitibus faceres invidendam. In Lateranenses Pontificias Aedes, Pauperes suscepisti: ut eos, quos Nepotum locò à Te haberi dicebas, re ipsa haberi constaret. Et sanè quis tam liberalis, ac profusus in Nepotes, ut Innocentius in Pauperes? His Palatia augustissima, census amplissimos, splendidissima congiaria, ac regia planè munera liberalissimus Princeps, atque amantissimus Parens donavit. Quid, quòd vel ipsas Horti sui delicias, in Pauperum alimenta convertit: adeo ut sibi Pontificatus labores, onera, & curas; illis fructus, emolumenta, ac delicias concessisse videretur. Licebat miserrimo, cuique inter chariores

ores Principis Nepotes adscribi. Patebat Egenis omnibus Pontificia Domus. Adeuntibus nunquam aliàs visa, aut cogitata Felicitas occurrebat, quæ per augustissimam illos veluti manuducens Domum, illis parata explicabat alimenta honestissima; eosque optimarum artium, ac divinarum virtutum magisterio instituendos tradebat. Nec precibus cuiquàm opus, aut lacrymis erat; ut tantæ particeps fieret felicitatis. Quin Ipse ultrò Innocentius miseros jubeat inquiri; & geminato beneficio, cogi imperabat, qui mallent in otio miseri esse, quàm in labore felices. Quò quidem consiliò, non Patris tantummodò curam induillè visus est Sanctissimus Pontifex; sed & Matris amorem, parvulos Suos, vel invitos, ac resilièntes, gremiò excipere, sinu fovere, atque uberibùs enutrire gestientis.

Illud verò quàm totum exprimit Matris amorem, quòd delicias suas Pauperes appellare consueverat? Et quidem re ipsa nihil magis in deliciis habebat, quàm sæpè illos invisere, cum illis versari, ac suis Ipse manibus stipem multiplicem singulis elargiri. Quòd si amor in filios, de illis parentem perpetuò sollicitam reddit; Magnum illum Rectorem humani Generis animum ea quotidie fatigabat cògitatione, quid in ærumnosorum ædibus, atque hospitiiis deesset. Adeò, ut, quicumque Innocentii curas, pro miserorum felicitate susceptas, scorsum ab aliis audiret,

diret: in his procul dubiò totum penitus fuisse Innocentium arbitraretur. At, qui reliquas omnes recensere, ac secum æstimare instituerit, Divinæ quadam Immenſitatis specie, totum in omnibus pariter, ac totum in ſingulis Innocentium deprehendet: & laudem illam Innocentiæ propriam, atque illi peculiarem fatebitur, quam in Deo demirari, ac de Deo prædicare, conſuevimus: quòd nimirum in magnis Se verè magnum, in minimis verè maximum comprobârit.

Divinum proſectò, ac Tuum, Sanctiſſime Pontifex, quòd nihil Tibi utilitatis, aut detrimenti in Summi Pontificatûs adminiſtratione ſuſceperis. Divinius. quòd ita Te totum uniſverſis impenderis, ac ſi vacâris à ſingulis: atque ita Te pariter totum impenderis ſingulis, ac ſi vacâris ab Uniſverſis. Illud verò diviniſſimum, quòd præſentibus intentus, in futurum provideris, ac partæ felicitatis perpetuitati proſpexeris.

Magnus Ille æmulator Divinitatis animus, dum totus vacare præſentibus videbatur; totus in eo erat. ut poſteritati uniſverſæ conſuleret. Hinc tot, ac tanta, quæ publicæ felicitati molitus eſt, opera ea ſoliditate conſtruxit: ut facile intuentibus conſtet, æternitati facta, æternitatem eſſe æquatura. Tot Sanctiſſimas Le-
ges, quas, ad ſtabiliendam Chriſtianam Rem-
publi-

publicam, sapientissimè condidit, in Volumen referendas curavit, quod rectissimam, atque perpetuam optimè constitutæ Reipublicæ normam, ac regulam merito dixeris. Quia verò nihil erat illi antiquius Religione, cui suas omnes curas, cogitationesque devoverat, non solum illi stabiliendæ in Europâ, & promovendæ studuit, instituendis, fovendisque tot sacris expeditionibus, quarum uni cuiuspiam aliquando quinquaginta millia nummum attribuit; verum etiam ad remotissimas Gentes, nondum Evangelii luce collustratas, in perpetuum proferendæ.

Laudabat, ac merito quidem, Superiorum Pontificum pietatem, & diligentiam, à quibus constitutum fuerat peregrinarum illud Missionum Seminarium; illa Congregatio clarissima, propagandæ Fidei addicta; illud ærarium, unde opes Evangelicæ, in ultimos Orbis terrarum fines, continuò sparguntur. Sed ut plantæ feraces ex hoc Seminario, ad inferendam barbaris mentibus Fidem, prodirent; videbat, esse aureo rigandum continenter imbre. Humanis egere subsidiis intelligebat Fidei Propagatores, qui toti sunt in rebus Divinis populo communicandis: ærarium, nisi benè fundatum, minui tandem, & velut Aquas, non ex perenni fonte ductas, exarescere. Quid egit Providentissimus Pontifex, ut his incommodis occurreret? Ut huic nobi-

nobilissimo Religionis Seminario perpetua constaret fertilitas; ut huic ærario perennis, divesque fundus suppeteret; ut nunquam Religionis Propagatores, Propagatoribus necessaria præsidia deessent? Constituit centum aureorum millia, ut ex ejus pecuniæ, sortisque vectigalibus annuis plùs, quàm triginta Evangelii Præcones, in Regionibus Orienti Soli subjectis, in perpetuum alerentur.

Consultum quidem, Sanctissime Pontifex, perpetuæ Religionis felicitati, & gloriæ, hoc factò voluisti; at simul gloriæ Tuæ perennitati, quod minime spectabas, consuluisti. Quot Æthnicos Illi Operarii Apostolici, ad Catholicam Fidem adducent, tot liberalitati Tuæ titulos, ac merita adjicient. Horum Evangelii Ministrorum manibus, Gentes sacro lustrabis fonte; illorum docebis ore, illorum laboribus perfrueris. Hæc Tempia, quæ surgent verò dicata Numini, Te Conditorem; Hæc Delubra, quæ superstitioni eripientur, Te Everforem loquentur. Hi pueri, qui Fidei rudimentis imbuentur, Tibi vitam sanctiorem acceptam fèrent, Teque publicum Parentem experientur. Crescent de Tuo, qui crescent Ecclesiæ; ac Tuïs beneficiis, ad augendam Sanctæ Matris Sobolem proficient: tantumque omnes Uni Tibi: quantum egregiis illis Institutoribus suis, ac Magistris, debebunt.

Sed

Sed non satis posteritatis felicitati consultum putavit, si optimas in posterum leges, earumque propagatores decerneret; nisi etiam optimos Christianæ Reipublicæ Administros in perpetuum provideret. Quod quidem quàm singularis Providentiæ consilio præstiterit, mecum ipsi Auditores, cognoscite.

Quædam pretiò emebantur, quæ ad Principatum pertinent, munera, atque ad ampliores Dignitates spem adeuntium fovebant. Morè istum invexerat ingens ærarii difficultas, & sapientis quædam ratio consilii, id minimè iniquum existimantis, quòd cum honor splendidior multò, ac pretiosior sit opibùs; istarum aliquid in commune conferret, qui supra communem hominum conditionem, assurgere honoribùs vellet: atque ærarium Principis sublevaret, qui à Dignitate Principis elevaretur. Illud verò maximè cavebatur: ne ab ullo pretium caperetur, nisi qui, vel sine pretio, honoris, quem petebat, dignus, & ad eum, quem sperabat, idoneus censeretur. Quare hujusmodi initiis ad amplissimas postmodum provecti sunt dignitates præclarissimi Viri, qui mirum in modum Christianam Rempublicam, Doctrinæ, Prudentiæ, ac Sanctimoniæ splendoribus illustravere.

Sed morem istum torvis, pravisque oculis intuentes, Catholicæ Fidei hostes, in omnem carpendi

pendi occasionem intenti, opportunum censuerunt conviciis locum: adeò, ut, quemadmodum ineptæ antiquitatis temeritas, os suum in Cœlum attollens, monstra Cœlo attingere, non dubitavit: haud secus impiorum insana temeritas, os pariter suum in Ecclesiæ Cœlum attollens, avaritiæ, atque ambitus monstra eidem appingere, non vereretur. Verùm non secus, ac Cœlum, securum splendoris, ac pulchritudinis suæ, cæcæ obtreptatorum audaciam, nunquam suis puniendam fulminibus, aut cœrcendam putavit; haud aliter iniquissimas in Ecclesiam Catholicam voces, ab impiorum hominum temeritate prolatas, nemo sapiens non contemnendas, ac ridendas arbitrabatur.

Illud (haud equidem inficiar) illud, inquam, videbatur incommodi; quòd periculum erat, ne interdum æquè digni, quòd non æquè divites essent, retardarentur: nec satis liberum Principi esset, inter æquales decernere, ubi, qui par erat merito, potior beneficio duceretur. Deinde ignaræ plebi suspiciosa, licet immeritò, ea consuetudo accidebat. Atqui è Republica esse censebatur, si qui muneribus præficiabantur, non solum optimi essent, sed & ab iis, qui regendi erant, optimi sine suspitione haberentur. Hinc priores Pontifices eum morem abolere exoptabant. Sed consilii, vel novitate, vel magnitudine, vel restituendarum vi pecuniarum

deter-

deterriti, irritò negotiò, desistere cogebantur. Unus tandem sapientissimè pariter, & constantissime id præstitit, Innocentius.

Qui Romæ stupor, cum videret una die, sexcenta supra decies centena, & viginti sex aureorum millia, iis, qui solverant, reddi! Qui hominum sensus? cum legem illam ferret Innocentius, quâ officiorum, ut ejus verbis utar, *venalitem*, in perpetuum suppressit, abolevit, extinxit? *Mandantes* (Audite Sanctissimi Legislatoris verba sapientissima) *mandantes*, ut *ejusmodi officia in posterum viris, vite, & morum integritate præstantibus, literarum scientiâ præditis, rerumque humanarum experientiâ insignibus, ad majorem Dei Gloriam, Romane Curie decorem, necnon virtutis incitamentum, & premium, gratis, & nullò receptò pretiò concedantur.* Ut omnes invicem gratulabantur, vel ab una hac lege sancitam in perpetuum Reipublicæ felicitatem! Cum intelligerent omnes, Ministros optimos ejusdem Regimini præfuturos. Non enim nisi optimos ad eas dignitates promoveri necesse est, ad quas Virtuti tantummodò, & meritis aditus patet.

Quin hæc ipsâ lege, non optimos tantum Ministros providisti, Sanctissime Pontifex, sed eos etiam, qui Te sequentur, Pontifices Maximos, quos verè optimos fore intelligimus: cum ex optimis constet, & ab optimis esse eli-

E

gen.

gandos. Quamquam, ut optimos in perpetuum esse statueret Summos Christianæ Reipublicæ Moderatores; singulari, divinissimoque consilio Innocentii Providentia prospexit. Illam, quam mente conceperat, animo infixerat, gestis expressebat, Summi Pontificis verè optimi Ideam, Se, ac sua negligentis, ut Se totum, suaquè omnia in publicam felicitatem impenderet. Hanc, inquam, Ideam augustissimam, ac planè divinam derivare, atquè infundere in Successores Pontifices voluit. Audite itaque, quid consilii excogitavit, suscepit, atque compleverit.

Communis ferè, aliquot jam sæculis tradita, apud Summos Pontifices consuetudo invaluerat, ex iis, qui ad Principatum pertinent, redditibus, atquè muneribus partem aliquam, sibi sanguinis affinitate conjunctis, erogandi. Quod quidem, & ad splendorem Principatus pertinere, & consanguineorum conditionem decere, integerrimi, sapientissimiquè Pontifices non immeritò arbitrabantur. Propiores præsentiam, qui longè præ cæteris esse solent, ac debent de Principis, atquè Imperii felicitate solliciti, ut in consortium curarum, ita & in partem reddituum suscipiebantur. Non secus ac Sol, Orbi universo illustrando, ac fovendo præfectus, Planetas suos in tanti muneris partem admittit: & quò propiores sunt; eò

majo-

majo rem illis non lucem modò, sed & calorem impertit.

Adhuc tamen Innocentii Providentia, non in sui tantum, sed in subsequen tium etiam sæculorum felicitatem perpetuò vigilans, atque intenta, præstantiorem multò, utilioremque Reipublicæ morem Sibi, ac Successoribus suis in perpetuum sequendum, statuendumq; decrevit. Tanti esse publicam felicitatem putavit; ut vel ipsius Principis, & consanguineorum impendiò sanciri posset, ac mereretur. Nihil optabilius fore existimavit, quàm si omnes, qui circa Principem sunt, eodem animò quò Princeps Ipse, se, ac sua publicæ utilitati devoverent. Igitur Sanctissimus Pontifex, qui legem putabat, optimum sequi: ne quid unquam populis superesset optandum; abire in debitum voluit, quod vix esse poterat, Votum. Legem tulit, quâ illud summatim cavuit: ne quid in posterum Romani Pontifices consanguineis suis, quòd Sui sint, ex Ærario Principis, aut publicis muneribus tribuant, nihilq; in illos impendant, nisi quod sincerè probatis ipsorum, non secus ac cæterorum, meritis, ad exactissimam Justitiæ normam, ac Regulam debeatur. Et convocato purpuratorum Patrum Senatu, omnes, ac singulos eò adduxit; ut Sacramentò se adstringerent, legem istam, ubi ad ipsos pertinuerit, Se in perpetuum servaturos.

Et quidem, quod verbô sponderant, re ipsa præstari. Ipse de Cælo, ad felicitatis Tuxæ cumulum, vides Beatissime Pontifex. Ingens Successorem Tuum numerus Consanguineorum circumstat, quorum Virtutes, ac Dotes ita perspectæ omnibus sunt; ut omnium in Se admirationem, amorèmqûe converterint: adeò, ut nemo sit, qui non Illis patem conditioni fortunam præcetor, ac voveat. Principis amorè præsertim sibi peculiaritèr merentur, ac vendicant: cum omnibus una mens, unus animus sit: Illius virtutes imitari; & qui propiores sunt, hoc uno ex capite dignoscantur, quòd Illum propius imitentur, ac referant. Quamobrem illos ames, necesse est, Clemens, Pontifex Maxime. Atqui id ipsum profiteri, cum se Tibi inclinantem supremæ Dignitatis apicem, omni ope detrectare contenderes. Ut universum purpuratorum Patrum Senatû, in Te uno deligendo, unanimi consensu, obfirmatum, à suscepto consilio amoveres, inter alios, quos movisti lapides, hoc etiam non semel objeceras: multos Tibi esse Consanguineos, quos amabas.

Nunc verò amorî Tuo nihil indulgendum, promissû memor, putas: atquè Unus documentor es: in eo, qui possit beneficia conferre, posse ab amore beneficia sejungi: multumquè discriminis esse, inter velle bonum, & facere.

Con-

Constantèr statuisti, quod olim promiseras, Princeps, implere. In Tui, ac Tuorum favorem, ea Tibi licere non putas, quæ in omnium favorem, Tibi licere, fatearis necesse est, Dignitatis Tuæ conscius, ac Potestatis. Supremus Ipse in Terris Legislator Innocentii legem revereris: Eidem par dignitate Successior obtemperas. Octavum jam annum Consanguineos Tuos supra privatorum conditionem extulit Dignitas Tua: adhuc Eos privatorum census, atque insignia circumstant. Tuarum hætenus nonnisi curarum participes, vel in literaria palestrâ, vel in forensi, vel etiam in bellicâ exerceri pateris, atquè insudare. Multarum vigiliarum, laborum, ac periculorum fructum esse jubes, quæ Illorum sponte sequi conditionem fas esset: atquè ad ea gradatim ascendere cogis, ad quæ statim eos advolare, fortuna Tua aspirante, optabamus. Omnia cum Tuis, uti cum reliquis, Virtutis lance metiris. Unum interest, quod Tuos diutius, ac severiùs, an mereantur, probas: & per eum callem, qui unus, Te Principe, ad Dignitates ducit, ut Tui à l'e alacriùs incitantur; ita tardiùs promoventur.

Illi interim amore tuo læti, gaudentesquè, nihil nisi gaudium ex Principatu Tuo decerpere, moram istam tam æquò animò ferunt; ut difficile dictu sit, utrùm majus censeretur Vir-

rutis miraculum debeat: vel quòd Tuum Ipse amorem, tanta cum severitate conjungis; vel quòd sua Ipsi merita, tanta cum Moderatione componunt. Quos ellè arbitramur Innocentii sensus, Te, ac Tuos de Cœlo spectantis? Ut mirum in modum Tuò erga suam legem obsequiò delectatur; ita à Te saculò Tuò, Tuoquè ab exemplo confirmatam in perpetuùm ejusdem legis observantiam, lætatur.


Immutabiles omninò sunt Divinæ Providentiæ leges: adeò ut iisdem semper motibus Cœlestes Orbes circumagi, iisdem circumscribi finibus maria, ac vel ab ipsa temporum instabilitate, suam perpetuò videamus stabilitatem, ordinemquè servari. Hanc Tibi laudem mereris, Beatissime Pontifex. Qui Divinæ Providentiæ consilia tam sedulò imitari studuisti, dignus es, qui ejusdem pariter felicitatem consequare. In perpetuùm vigeant sanctissimæ Leges, quas ad perpetuam Catholici Orbis felicitatem, tam providè, sapienterquè sanxisti. Perpetuus illis erit honor, & cultus: Atquè earum beneficio Christiana Respublica Ministris optimis, Summis Moderatoribùs Optimis, ad felicitatis suæ perpetuitatem, fruatur.


Intelligat itaquè Universa Posteritas, quantum Innocentio debeat, qui tam Divinam Providentiæ normam, ac Regiminis Ideam invenit, suisque Successoribus imitandam proposuit:

FUNEBRIS

posuit: Ut Divinæ quodammodo particeps Infinitatis, nihil Sibi, vel utilitatis, vel detrimenti ex Summi Pontificatus administratione susceperit: Divinæ veluti socius Immensitatis, ita universis intenderit, ac si vacârit, à singulis: atque ita pariter intenderit singulis, ac si vacârit ab universis: Divinæ deniquè veluti coævus *Æternitati*, dum præsentibus intenderet, in futurum prospexerit, & subsequen-
tium sæculorum felicitati providerit. Adeò, ut absolutissimam Divinæ Providentiæ Imaginem, in Summi Pontificatus administratione exhibuerit. Cum peculiare ipsas Divinæ Providentiæ Dotes, peculiare Providentiæ
Sue laudes effecerit.

D I X I





GREGORIUS XIII.
PONTIFEX MAXIMUS
SÆCULORUM FELICITAS.
ORATIO FUNEBRIS
ANNIVERSARIA,

*Habita in Aula maxima Collegii Romani
Anno SÆCULARI MDCC.*

Instituerunt sapienter Majores nostri; ut Gregorio XIII. solemne penderemus quotannis laudum vectigal, perpetuum grati animi monumentum, Eminentiſſimi Eccleſiæ Principes: Ut quando Pontifici, de Nobis optimè merito, pares referre grates non posſumus; eò saltèm, quò posſumus modò, & quamdiù posſumus, referamus. Quòd si omnes in posterum anni tributum hoc laudis persolvere Pontifici, vel de omni Posteritate optimè merito debent; sæcularis hic potissimum annus,

annus, qui duorum tangit confinia sæculorum, exeuntis videlicet, ac ineuntis, præcipuò quodam jure, facer esse Gregorii laudibus debet. Quam enim decet; ut in hoc Romano Lyceo, ubi, Tanti Principis beneficiò, bonis erudiuntur artibus, moribus optimis imbuuntur sæcula, quàm, inquàm, decet; ut, cùm eadem incipiunt. aut desinunt, ejus Nomen, laudesquè prædicent, cujus Liberalitati, ac Magnificentiae acceptum ferunt, quod iis erudiri, atquè imbui possint? Assuescant Sæcula, dum velut ex cunis prodeunt, balbutire ut possunt Gregorii Nomen: jam tum incipiant, primulís vocibus optimum Parentem salutare: Cùm verò ad interitum vergunt; eam, quâ frui licuit, felicitatem in Eum referant, qui non sui tantum sæculi, sed subsequantium omnium felicitati prospexit: Ut Sæculorum dici Felicitas jure possit.

Consueveras olim, Roma, cùm Imperatores tuos, (quibus adulari, aut proderat ad felicitatem, aut oportebat ad salutem) celebrare præconiò illustri, & præclarò insignire cognomentò velles: Consueveras, inquàm, illorum inscribere Numismatis: Sæculi Felicitas. Moderatius quidem istud, quàm cum eos in numerum Deorum transcriberes, divinisque honoribus coleres, quos commune mortalibus fatum intra hominis conditionem incluserat,
vel

vel cōmunia ferè illis Principibus vitia infra hominis conditionem dejecerant. Fuerit illud adulantis delirium, vel quādam obsequii erga bonos Principes Intemperantia, quod amor virtutis, aut crudelitatis metus expresserit. Cōstat illud quidem certè, nullum Principi nomen aptius, nullum augustius inveniri posse, quàm si Felicitas sui Sæculi appelletur. Re ipsā enim hoc habent Principes commune cum Deo, quòd felicitatem hominibus impertiantur: quod cū faciunt, Populorum Felicitas appellari meritò possunt. Verùm ne adulari ego ipse videar: Magnificentius longè, quàm verius optimus quisquè Imperator Sæculi dicebatur Felicitas, cujus Imperium, & modicis definitum Terræ limitibûs, & angustò temporis spatiò claudebatur. Nunc enimverò, quòd eos Divinitus sortita es Principes, Roma, qui Terras, & Maria; Cœlumquè ipsum dominationis quadam amplitudine complectuntur, quique ad eam nati sunt felicitatem hominibus procurandam, quæ nullis unquàm definiri sæculis potest; si profectò, si Se tanti capaces Imperii, tantæquè felicitatis opifices præbeant; digni sunt, qui citra allentationem omnem, non unius tantum sæculi, sed Sæculorum Felicitas prædicentur.

Cognomentum hoc augustissimum, & planè Divinum peculiari quodam sibi jure vindicat

Grego-

Gregorius Boncompagnus Pontifex Maximus, ejus nuncupationis Tertius Decimus: qui eò semper omnem operam suam, ac studium, cogitationesquè omnes intendit: ut omne Felicitatis genus, omni Mortalium generi, omnibus in pasterum Sæculis compararet. Argumentum dicendi amplum, ut videtis, dignum hòc tempore, dignum locò, dignum Româ dignum Gregoriò: de quo nisi apud Sapientes dicerem, verendum mihi esset, ne plùs admirationis habiturum esset, quàm fidei. Sed & apud eos loquor, quibus exploratæ penitùs sunt res ab eo gestæ immortales, amplissimæquè: & in eo versamur loco, in quo Parietes ipsi, Tanti Pontificis monumenta, Posteritatis felicitati sacra, disertis coloribus exprimentes, locupletissimi aderunt Testes, quàm jure à Nobis Sæculorum Felicitas appelletur.

Quam felix est Populorum conditio, cùm ejusmodi nacti sunt Principem, qui certum id, ac propositum habeat, populisquè palam denunciet, nec verbo tantùm, sed re ostendat, ad publicam Se felicitatem natum, ad id supra cæteros evectum, & in solio collocatum esse: non secùs ac sidera, quæ ut Terris luceant, insident Cælo! Eò primùm die, quò Gregorium ad Orbis Catholici regimen omnia publicæ felicitatis delegerunt Vota, primam hanc, dignam Principe, dignam Pontifice, dignam

gnam Gregoriô vocem edidit: Se in omnibus aliud nihil, quàm felicitatem publicam spectaturum. O vocem beatissimam, quæ felicitatem Populis futuram nunciavit, futuri Principatûs ideam haud obscure adumbravit, & imaginem verissimam. Divinamquè proposuit! dubitavit nemo de felicitate illa, quam is promitteret, Princeps quem certò scirent, ea quæ diceret, velle; quæ vellet, posse. Immo verò præsentem illicò felicitatem omnes invicem gratulandi sensere. Incipit enim felix esse, qui brevè se futurum putat. Nec verò mutuas Populorum gratulationes perturbare potuerunt, occurrentes ubiquè Terrarum, calamitates innumeræ. Cùm intelligerent omnes. Magno Pontificis animo obices istos, non impedimentum ad maxima, quæ meditabatur, consilia; sed incitamentum esse allaturos: Et quò gravioribus cum difficultatibus consistendum foret, quò major vis malorum urgeret; eò majorem Tanti Viri laudibus, virtutibusquè materiem præberi, amplioremque se se aperire campum, ad uberiores bonorum segetem colligendam. Et sanè quoties illorum caliginem temporum cum ea comparo serenitate, ac luce, quæ Gregoriô imperante, Orbi Terrarum affulsit; toties ea subit animum cogitatio: Arcanâ quâdam destinatione Superûm, idcirco tunc temporis ademptam veluti felicitatem; ut
eam

eam Gregorius, ingenti cum sænore, omnibus in posterum sæculis redintegret. Quod quidem ut liquidò constet, revocate in animum, Auditores: Duplex esse Felicitatis genus. Alteram Civilem dixerim, & Humanam; Sacram alteram, atque Divinam. Utramque Gregorius, totò pene terrarum Orbe prostratam erexit, erectam amplificavit; amplificatam firmavit.

Et Priore quidem Civilem Felicitatem tribus confici existimo: Pacis Tranquillitate, Opulentia Civium, Bonarum Artium cultu. Hæc enim ubi una consenserint, ibi existit otium cum dignitate, quò nihil unquam felicius Reipublicæ ne fingi quidem à sapientibus potuit.

Tibi gratulor, Felicissime Pontifex (præsentem enim alloqui videor, qui omnium præsens erit memorie sæculorum) Tibi, inquam, gratulor, quòd incideris in plena calamitatibus tempora: Ut inde innotesceret magis Tuæ Virtutis ampliando, nostræ Felicitatis cura. Circumspice Orbem, tuo subjectum imperio: Occurret ubi; vel amplius desiderium, vel amittenda metas felicitatis. Quid, quòd ne ipsam quidem ulquam reperies umbram felicitatis, & initium? Cum enim Tranquillitas reliquorum sit creatrix, & nutrix bonorum; omnia cernes ubique illorum, seditionumquæ, vel tumultibus, vel suspicionibus perturbata. Aspice Hi-

spaña-

spaniam Belgicis turbis incertam; Lusitaniam clade Principis inflammata: Poloniam de novo Rege sollicitam, & in partes Religionis causâ distractam. Aspice Angliam, ob Reginæ scelus, in bonos furem; Germaniam novis in dies tumultibus, acrimisque Hæreticorum odiis convulsam; Galliam discordem, & utriquè pariter timentem, Regno, & Religioni. Ipsam deniquè aspice Religionis sedem, Italiam, quâ Principum factionibus, quâ suspitionibus, nec Sibi satis, nec Romano Pontifici fidemtem. O temporum perturbationem tristissimam! Quis in his dissidiis, erroribus, miseriis aliquem felicitati revocandæ locum esse putet? Quem non oppressisset hæc rerum moles, quæ Gregorij animum, omnibus difficultatibus celsiorem erexit?

Tam infelicium temporum conditionem sibi Gregorius felicitati vertit: quod inde Populos facere feliciores posset, veteris comparatione calamitatis. In spem itaque præsentioris felicitatis assurgens, quod voce illa, divinò planè instinctu prolatâ, spononderat. omnes eò curas, cogitationesque convertit, ut Orbi Catholico Tranquillitatem ubiquè tutissimam compararet. Jam Oratoribus sapientissimis ad Principes missis, jam plenâ sapientiâ, & benevolentia literis; modò Authoritate, modò consilio usus, tot ubiquè Terrarum perturbationes

compo

composuit tandem. Immò verò composuit statim. Statim Melitenſium Equitum acies, fraterna mox ruituras in vulnera, ad Pacis fœdera revocavit. Statim civilia Ligurum incendia, nec ſuis obruenda fluctibus, Pacis aurâ reſlinxit. Statim Polonum cum Sveco, cum Moſcho Germanum, datis in fœdera dextris, conciliavit. Statim... Sed quid in immenſum excurro per ſingula? Statim omnes armorum motus, furoresquè compeſcuit, omniumquè animos ad publicam tranquillitatem inſlexit.

Quid hîc prius, Gregori, quid in Te potiſſimum mirer? Eamne Divinam planè Sapienciâ, quæ involutas adeò rerum ambages explicavit: quæ tot Principum animos ad concordiam inclinavit, è bello ad pacem, è tumultu ad otium traduxit? An celeritatem, quâ tot procellas ita repente ſedâti: ut improvîſa quies memoriam priſtinæ tempeſtatis propè obliteraret? Illamne potiùs mirer amplitudinem mentis, quæ res innumeras, graviffimâquè complexa, non modò nullis premi anguſtiis potuit; ſed ne occupari quidem: Adeò ut, cum de Orbis univerſi tranquillitate cogitares, nihil de mentis tranquillitate, ac pace deperderes; privatorum interea cauſis, atquè emolumentis incumberes; & qui tantus in maximis eras, totus eſſe in minimis videreris? Immò verò perinde ac ſi tantæ magnitudinem mentis jam non caperet Orbis

Terra-

Terrarum; alios sibi quarens Orbes, in Cœlum usque se contulit: & exoriam ibi quandam veluti seditionem astrorum, & perturbationem temporum stabili lege composuit.

Macte his animis, Gregori, & quam cœpisti mortalibus parere felicitatē, absolve. Magnum est, ac Divinum, quod Tranquillitatem Orbi Catholico comparaveris: quod Cœlo, & Sæculis suam etiam tranquillitatem, & ordinem restitueris. Sed non adhuc factum est satis Populorum votis, Sæculorum Felicitati, Tuæquē vel Virtuti, vel gloriæ. Pariō feliciter otio, nunc Tibi de dignitate ipsa cogitandum est: augendæ opes: sublevandæ pauperum calamitates: consulendum Reipublicæ cōmodis: revocandus bonarum artium cultus; ut Orbis Terrarum eā, cujus Author es, tranquillitatem honestē frui, ac suaviter possit.

Non meas, non Populorum preces expectat ejus Liberalitas Principis, quæ omnium prævertit vota. Vix electum Pontificem novimus, statim Beneficentissimum, ac penē prodigum sentimus. Ea ipsa die triginta aureorum millia distribui in^o pauperes Jussit: Venturane dixerim semina, an præsentis fructus felicitatis? Ne fas duxit, prius Principem, quam liberalem deprehendi: & felicitatem prius spondere, quam dare. Pulchrum est, sac Tuum, Gregori, quod Principatūs initiō, non modò à Populo tributa non exigis, sed Ipse Populo liberalitè donas.

Pulcri-

Pulchrius tamen, quòd morem istum constanter sequutus, perpetuo largitionum usu, Liberalitatem Principis Pauperibus quodammodo feceris vectigalem. Hæc enim est Beneficiorum conditio: ut vectigalium more excipiantur, cum statis temporibus conferuntur. Aliorum hoc Principum fuerit, aliena munera in tributa convertere. Sua Gregorius munerá referri in rationes Pauperum iussit; ut tributorum in morem Pauperibus penderentur. Et quidem quàm digna, quæ solvantur à Principe Tributa: Vicies centena, & quadringenta aureorum millia in Pauperes erogata! Liberalitatem istam immortalitati consecraturus Senatus Romanus, mar-moreum in Capitolio Gregorio simulacrum erexit, hâc inscriptum Epygraphe: Ob Singulâri Beneficentiâ in Egenos Distributum Sestertium Octingenties.

Bene est, Roma, quòd Jovis occupat in Capitolio locum Liberalissimus Princeps, quem melius Antiquitas appellasset Jovem. Olim Jovis appellationem, & existimationem Divinitatis mortali fecerat, juvare, & prodesse mortalibus: Quòd nihil tam Divinum putaretur; quàm beneficia hominibus elargiri. An non potiori jure apud antiquos illos Divinitatis dispensatores prodigos, parem fecisset Gregorio existimationem, ac nomen, addita studio adjuvandi mortales, præcipua sublevandi pauperes cura? Nul-

lum enim Beneficentiæ genus Divinius, quàm quod nullà spe redimendi, in egenos impenditur. Et sane quàm accuratè, ac sollicitè occurrere calamitatis pauperum studuit? Xenodochia frequenter invisere, ac ditare: Dotem Virginibus, Peregrinis alimenta largiri: perenni quodam Congiario pauperes recreare. Quid etiam, quod sæpè Munificentiam suam per Urbem circumferens, suis Ipse manibus, densatis pauperum gregibus, stipem multiplicem singulis largiebatur?

Quale spectaculum. Roma, cum Principem tuum, Moderatorem Orbis Terrarum, immistum cerneres pauperum turbæ, occurrentis Populi impetu huc illuc abreptum, nequidquam Prætorianâ oblucente Custodiâ: Dum interim mitissimus Princeps vim populi pati gauderet, quam oblitus Pontificiæ dignitatis amor, & blandè protervus interret! O novum, ac triumphale spectaculum, ubi Liberalitas Principis de Sua ipsius Majestate triumphat! Quamvis nihil hoc factò Tanti Principis Majestati detractum, quæ ad summum Dignitatis, Virtutis, Gloriæque fastigium erecta, hoc uno tandem augeri poterat modo: Si se ipsam demitteret, & ad aliena incommoda sublevanda deprimeret. Dei planè mos est, ut liberalitatem exerceat, suam quodammodo negligere Majestatem.

Sed parum adhuc ista sunt Munificentia Tur-
quæ

quæ omni beneficiorum genere, omnē mortaliū genus, omniaque in posterum sæcula complecti debet. Quod enim unquam non ad utilitatem tantū, sed ad dignitatem Reipublicæ exoptari commodum potuit, quod non illico munificentissimus Princeps magnifico sumptu paraverit? Quid memorem additas Vaticanis Aedibus moles, vibratas salientibus aquas, suspensos canalibus Fontes, deciduos è fontibus Fluvios, junctum pontibus Tyberim, stratas in salebroso, & prærupto solo Vias, restituta Tempia, erecta Cœnobia, ornata Sacella, imposita Quirini collibus Pontificii adyti Veneranda Sacraria, Horrea propulsandæ penuriæ ad Esquilias collocata? Hæc, aliaque innumera, tot locis diffusa, Pontificiæ Beneficentiæ Monumenta ingentis illius animi imaginem præferunt, qui ad omnia humana, vel ornamenta, vel commoda paratum semper, accinctumque se præbuit. Eam enim Magnificentiam, ac stabilitatem ostendant; ut satis intuentibus constet, æternitati sacra, æternitatem esse æquatura. Nullum ergo sæculum, Pontifex optime, expers erit Liberalitatis Tuæ: ut nullum fuit hominum genus, nulla tam remota, ac dissitā Natio, ad quam non aliqua Tuæ liberalitatis portio pervenerit. Non enim unius Italiæ, aut Europæ finibus claudi se passa est Liberalitas Tua, sed more Solis, omnia

perlustrantis, ditantisque, Asiam, Africam, Americanosque tractus beneficiis implevit.

Divinam hanc Beneficentiam Tuam non audientes modò, & legentes, sed fuisset oculis intuentes Posterì, quod nos ipsi facimus, incredibili quodam erga Te amore, & admiratione rapiuntur. Sed quanto stupore perculsos videre videor, cùm intelligent, quod omnibus dedisti, nemini ereptum? Constat enim illud certissimum, nullum à Gregorio impositum Populis vectigal, plurima verò, & magni proventus remissa: neque ullum passus est Populi onus, nisi quod ad publicam felicitatem spectans, non inter onera esset, sed inter munera computandum. Utrumque Liberalitatis Tux: Vel quòd onerosa Populo Tributa dissolveris; vel quòd aliqua esse permiseris, ad pensitantes ipsos fœnore multiplici reversura. Omnibus ergo locupletatis, unus pauperior factus est Princeps. At ne Ipse quidem. Non est exhausta, non imminuta opibus ejus Liberalitas Principis, quæ reliquos omnes ditavit. Immo verò Ærarium ipsum Pontificium plurimo alieno aere liberavit: & quod mirum est magis, annuo insuper centum millium aureorum redditu auxit.

Hærebunt ad hæc admirabundi invicem Posterì, rogantes mutuò: Quì fieri tandem poterit; ut tot tantisque opibus in omnium utilitatem profusis, remissis Populo vectigalium pro-

venti-

ventibus, adhuc tamen *Ærarium* ditaveris: Cum reliqui Principes, etsi multa à *Populo* exigant, pauca distribuunt, deesse tamen sibi plurima sentiant? Intelligent tamen, vertendum id miraculo sapientiæ, & Frugalitatis Tuæ. Sapientiæ quidem, quæ ferrifodinis inventis, absterfis, exsiccatisque Paludibus, aliisque ad genus artibus, naturam ipsam sibi vestigalem fecit: Illi pensanda imposuit Tributa *Populorum*, & distribuenda sæculis dona. Nec dictu absonum puto, Naturam ipsam rerum, in certamen veluti Liberalitatis adductam, quas gremio condit divitias sponte suâ largissimè profudisse, implevisse agros ubertate multiplici: Ut tantæ Liberalitatis materiem sufficeret: & dispensanda mortalibus, sæculisque omnibus munera *Gregorio* Parenti optimo suppeditaret.

Tribuendum præterea Frugalitati Tuæ *Gregori*, quæ omnem luxus materiem, quæ infinita propemodum solet esse Principibus, in Liberalitatis materiem convertit. Sed non ingens tantum Liberalitatis fructus in mortales omnes ex hac Parsimoniâ profluxit. Frugalitate etiam istâ impositus est alienis cupiditatibus pudor: pulla indigentia, quam immodica cupiditas parit. Cum enim ad mores Principis componamur omnes; quis auderet remotorum littorum pisces, peregrini aeris volucres, alieni temporis flores optare; cum videret Principem suum, Terrarum,

hominumque Dominum, parcè contentèque viventem, modico, & vulgari cibo jejunia longa solantem?

Immodicis itaque cupiditatibus demptis fecisti Posteris dubitandi locum: Tene liberalem magis Liberalitate ipsa: an Frugalitate præstiteris. Enimvero haud satis scio, magisne ille divites faciat, qui opes cupientibus donat, an qui cupiditates ipsas imminuit. Cum enim opes, non secus ac addita igni materies, cupiditatis immodicæ flammæ non extinguant, sed augeant: quò plures opes suppedites; eò cupidiores interdum, ac miseriore facies: plura sufficiens irritamenta cupiditatis, & incrementa indigentia. Ubi verò modam cupiditatibus ponas, subtractâ indigentia causâ, eò divites magis, quò minus cupidos facis. Utrumque res habeat, sapienter, ac liberaliter, Munificentissime Pontifex. utroque humanæ Reipublicæ à Te consultum est modo. vel Beneficientiâ, vel Parsimoniâ tuâ. Altera opes mortalium auxit: Altera cupiditates. compressit: Utraque divites fecit.

Perge. quæ reliqua publicæ Felicitatis pars est; Bonas Artes, ac Disciplinas erigere jacentes. earumq; Dignitatem, & cultum augere: Quid enim est ignava, & opulenta Tranquillitas, nisi plurimorum illicium, & lenocinium vitiorum? At quo tandem in loco ista commemoro? Nempe in hoc Romano Lyceo, quod meritò Regiam dixi-

dixerim Gregorii Beneficentiâ Bonarum Artium perpetuitati, ac dignitati constructam. Vagabantur passim incertis sedibus præstantissimæ Artes: Nusquam ferè domicilium stabile, ac certum habebant. Cum enim suapte naturâ, & ingenio studiosæ sint Pacis. & Tranquillitatis sociæ; quo tandem in loco sibi stabilem sedem deligerent, in ea perturbatione temporum, cum ubique Tranquillitas domicilium haberet in fuga?

Sapiens hoc Tuum consilium, Gregori, quodd Orbis Catholici Tranquillitate compositâ, præclaris Artibus, quæ Pacis noramenta sunt, ac præsidia, in hac Urbe Urbium Reginâ, non stabilem modò, sed perpetuam sedem, & quoddam velut imperium decernis. Bene est quodd Magnificentiam animi Tui, non ut Imperatores olim, ad Amphiteatra crudelitati dicata convertis, non ad Thermas castra luxuriæ, sed ad Lycea sapientiæ augustissima, & Bonis artibus sacra. Ut spiritum, sanguinem, & Patriam recepere statim Artes optimæ, ubi sensere, redditas sibi in hac Urbe Dominâ Gentium Athenas suas! Abundè quidem ad earum felicitatem fanciendam, amplificandam latissimè dignitatem, & cultum. Hic enim præstantissimis disciplinis imbuitur ex omnibus ferè Nationibus delecta Juventus, reditura ad regiones suas, ditata eruditione multiplici, atque aliis impertitura eas

doctrinarum opes, quas sibi in hoc ipso loco, velut è quadam fodinâ sapientiæ comparavit.

Sed nihil unquam satis Gregorio fuit; cum esset aliquid amplius. Quid enim tam grande? quid tam sumptuosum, atque magnificum ad augendas, vel ornandas, vel etiam firmandas, ac stabiliendas præclarissimas Artes excogitari opportunum potuit; quod tanti Pontificis Providentiam effugerit, Liberalitatem fatigaverit, vicerit Magnificentiam? Occurrunt hîc statim Typographiæ amplissimæ, quas in subsidium Literatorum instruxit. Occurrunt innumeræ, celeberrimæque Academiae, quas vel primò erexit, vel sustinuit labentes; vel inopes locupletavit. Sed hunc sibi præcipuè vendicant Orationis locum immortalia Gregorianæ Beneficiæ Monumenta, quæ in hujus Aulæ coronidem suis distributa coloribus, vestros invitant oculos, Auditores, meamque incusare videntur in dicendo moram: Tot nimirum Seminaria, Gregorii manu ubiq: Terrarum sata.

Et primò quidem Collegia tam multa, quæ hac ipsâ in Urbe non erexit modò, sed aluit. & proventibus annuis locupletavit: Ut cùm Nationes exteræ, ad hauriendas liberales Artes, Romam confluerent, quò libentiùs facerent, non Præceptores tantùm Romæ invenirent, sed Parentes, Domum, & Patriam suam. Vestram hîc Patriam Germani habetis, & Ungari; Vestram,

stram, Angli; Vestram, Græci; Maronitæ, vestram. Vos, quotquot Romam confluitis, Bonæ Artes excipiunt, ut Cives; Vos Pontificiis proventibus alunt; Vos ad honores, ac dignitates promovent; Vos denique disciplinis optimis imbuunt, ut eas ipsas in Regionibus vestris aliquando reduces dispergatis.

Quid etiam, quod Romam quodammodo per universum Orbem circumferens, ubique Collegia posuit, quorum Catalogum texere ipsa prohibet multitudo? Quamvis enim supra reliquorum hominum conditionem elatus, nunquam tamen se hominem esse, ac mortalem oblitus; gnarusque propterea felicitatem illam, quam Orbi Catholico procreare contenderat, perpetuo se tueri non posse; modum invenit, quo vel absens in posterum tutaretur. Ubique Terrarum Seminaria posuit, quæ in spem Orbis Catholici alerent Principes optimos, Sanctissimos Præfules, Virosque sapientes: Qui, Gregorii Beneficiam, & moribus innutriti, futuri aliquando essent publicæ Tranquillitatis Præsidia, Calamitatum Vindices, Bonarum Artium Auctores, Universæ denique Patroni felicitatis.

Quod si qui Populorum Felicitati prospicit, jure optimo dici Populorum Felicitas debet; An non Sæculorum Felicitas is appellandus est Princeps, qui Orbis universi, & subsequenrium omnium Sæculorum Felicitati prospexit?

Quid

Quid verò, Auditores, quòd Civilis ista Felicitas, quæ postremum est vulgò Populorum Votum, optimorum etiam Principum meta, initium dumtaxat, ac fundamentum est, ac primus veluti gradus excellioris longè, ac Divinioris Felicitatis, quam Sanctissimus Pontifex Orbi Universo, Sæculisque omnibus moliri semper, atque impensissimè studuit? Illius nimirum, quæ in veræ Religionis cultu, & Divinissimarum Virtutum studio sita est? Quæ duo ad immortalem Cœlestis Patriæ Felicitatem ita nos habiles, & comparatos efficiunt; ut eam ipsam spe quadam certâ prævertere, ac prælibare contingat. Huc enim semper toto pondere consiliorum, totoque nisu mentis incubuit Sanctissimus Pontifex: ut Divinam hanc felicitatem, quæ supernæ quædam imago est, ac festinata veluti prælibatio Felicitatis, omni mortalium generi, omnibusque in posterum sæculis compararet. Quorsum enim putatis tot artibus partam Tranquillitatem Orbis Catholici: nisi ut consociata fœdere Catholicorum Principum arma, omnia in Romanæ Fidei hostes converteret, iisque demum subactis, in Orbem universum inveheret veræ Religionis cultum? Quorsum tot opes, ac munera in omne mortalium genus ab Ejus Libertate profusa arbitramini; nisi ut occupatos beneficiis animos ad morum integritatem, & sanctimoniam volentes impelleret, & ad Divinissimam

nissimarum Virtutum studia inflammaret? Quorsum denique tot ubique Terrarum Bonis Artibus extructa Domicilia; nisi ut Divinæ hujus Felicitatis perpetuitati consuleret, ubique positæ Romanæ Fidei castris, ubi totidem, ut ita dicam, sacri milites, Gregoriano ære conducti, sanctioris militiæ Tyrocinia ponerent, ad tuenda perpetuò, & augenda veræ Religionis jura?

Hic verò quàm ingens mihi se aperit dicendi campus, si angustia temporis ferrent? Quam enim Orationem exposcerent, accisæ tot Hæreticorum vires; tot Nationes, ad veræ cultum Religionis traductæ; tot Belli apparatus, ac studia, in spem Orbis universi ad Fidem Catholicam redigendi?

Quàm esset dulce, quàm copiosum referre, quâ Sapientiâ, & Virtute Ugonotorum vires in-
fregerit, Truxesium Coloniâ exturbaverit, Lutherum in Germania vexaverit, in Gallia penè Calvinum extinxerit, è Belgio Bajum ejecerit, Dioscorum denique, cum Nestorio, toto Oriente depulso, ac perditos exterminarit? Immensum esset Svecum, Danum, Moschum, Bungos, Thracas, Brasiles, Æthiopes, Indos, Persas, Japones, aliasque Nationes, Insulasque oratione percurrere, quas toto divisas Oceano, curâ tamen Pontificis, & Parentis Charitate complexus, vel Fidei mancipatas, deditas Tibi, Roma, fecit; vel Pontificiæ Majestatis veneratione percussas inspexit.

Incre-

Incredibile denique, quo labore, & constantia Catholicos Principes stimula-verit, ut junctis viribus, sacro bello Othomanicum nomen dele- rent: ob id Pontificiis ferè opibus classes orna- verit, Hispanico, Thyrrænoque mari commissas, in Thraciam alteras trecentis triremibus, & se- ptuaginta militum millibus instructas; alteras in Rebellis Angliæ littora, non minori virium ap- paratu munitas. Atque utinam ingentibus Vo- tis pares habuisset Catholicos Principes, nulli- usque desidia peccatum esset! Vidisset Felicissi- mus Pontifex obsequentem Catholicæ Fidei Or- bem Universum, & quod unicè optabat, Divinæ participem Felicitatis. Sed quamvis eventus minùs consiliis responderit: nullâ tamen dimi- nutus est parte Pontificiæ Magnanimitatis splen- dor: accessit verò Constantiæ laus, quæ loco Vi- ctoriæ stetit.

Quod verò ad alteram spectat Divinæ hujus felicitatis partem, Divinissimarum videlicet amo- rem virtutum, & cultum, quàm multa mihi cur- sum dicenda sunt, quæ integram sibi laudatio- nem, vel singula vendicarent? Incredibilis nem- pè Vigilantia Pastoris, quâ non Juventutis mo- dò, sed omnium ætatum moribus, ad omnem virtutem formandis, ita semper incubuit: ut Draconem, vigilantia symbolum, Boncompa- gnæ Familiæ gentilitium stemma contigisse Di- vinitus putem, ad Gregorii Vigilantiam, vel promit-

præmittendam, vel adumbrandam. Mira illa in præcavendis, puniendisque criminibus admista Clementiæ Severitas, Severitati Clementia: Aded ut quos clam corripiebat, dissimularet palam; & quos publicè puniens insequeretur suppliciis, privatim parcens commiseratione, & lacrymis prosequeretur; amaretque miseros, quos scelestos odisse cogebatur. Quo quidem temperamento virtutum præcavit Bonis, ne mali fierent; Malis, ut mali esse desinerent. Verebantur scilicet Boni Justitiam lædere, amore Clementiæ; Mali, Clementiâ abuti, timore Justitiæ.

Sed ad hanc Felicitatis partem mortalibus conciliandam, optimo usus consilio, omnes in Se uno complexus est, maximas, divinasque Virtutes. Cum enim Summus Pontifex in supremo rerum humanarum apice positus sit; ut Orbi universo doctrinæ luce, & sanctimoniæ exemplo præfulgeat; Ad Eum omnium mortalium diriguntur obtutus: Omnes imitari desiderant, quem mirantur: atque ad ejus normam suos mores conformando; ad ejus similitudinem imitatione assurgere exoptant. Omnes ergo homines optimos, vel ut optimi fieri possent, Gregorius fecit, cum Se optimum omnibus præbuit omnium Virtutum Exemplar.


Quàm feliciter deniq: per Sacerdotes, suis sumptibus, suis consiliis, operâ suâ institutos, formatos, ac formandos in posterum Divinæ
hujus

hujus Felicitatis perpetuitati prospexerit, testantur satis tam multi, qui vel profuso sanguine Religionem Catholicam fortissimi Martyres irrigarunt; vel sapientissimi, ac vigilantissimi Præsules, Romanam Fidem in Germaniâ præsertim, atque Britanniâ periclitantem, adversus hæreses tutati sunt; vel Purpurati amplissimi, Romanæ Sedis dignitatem, ac decus ornavunt; vel etiam Pontifices Maximi, Sanctissimis legibus Religionis cultum, & morum Sanctitatem auxerunt. Adeò ut, quoties profluentes ab hisce Gregorianis sapientiæ, virtutisque Seminariis Catholicæ Fidei proventus mecum ipse recolō, toties in hanc spem assurgat animus: fore aliquando; ut Gregorii vota, ac studia, quibus veræ Religionis cultum, & sanctitatem morum invehere in universum Orbem contendit, per Alumnos suos, ab illa Superum, ubi jam quiescit, Arce videat feliciter impleta.

Quid ergo reliquum fecit Sanctissimus Pontifex, ut omne Felicitatis genus, vel universis Mortalibus pareret, vel Sæculis omnibus confirmaret? Quanto itaque jure appellari à Nobis Sæculorum Felicitas debet, & si quid speciosius, si quid Divinius in Mortalem cadere Deo simillimum potest.

Reliquum est, ut suam Felicitatem Sæcula Gregorio acceptam ferant: hoc in initio, hoc in decursu, hoc in ipso interitu profiteantur: & quas

quas ipsa per se se satis persolvere grates non possunt, suo etiam nomine, subsequenter Sæculis persolvendas committant. Fecit Sæculum istud, facient subsequenter omnia: & in hoc ipso loco facient, quem Tanti Pontificis Beneficentia Æternitati sacrum voluit; & Societas nostra, tot obstricta memoriâ beneficiorum, immortalibus Tanti Pontificis laudibus sacrum perpetuò fore decrevit. Dixi.



LUDOVICI XIV.
REGIS CHRISTIANISSIMI
ORATIO FUNEBRIS
Habita Romæ in Lateranensi Basilica
Anno MDCCXI.

Fuit Magnus secundum nomen suum. Eccl. 48.

Quem extinctum lugetis, Eminentissimi Ecclesiæ Principes, Præsules Illustrissimi, ac Reverendissimi Domini, Cui religiosè adeò, ac splendidè, ut Vos atque Illum decet, justa persolvitis, Cui magnificum hoc erexistis doloris, obsequii, & grati animi Monumentum, Eum
Ipsum

Ipsū immortalī fletu lūget Gallia, lūget Religio, lūget Orbis terrarū unīversus: Gallia quōd Regem Magnum amiserit; Religio, quōd Magnum Vindicem; Orbis terrarū, quōd Magnum Heroem: Ludovicū videlicet Quartū decimū; Christianissimū Regem, cognomēto Magnum, & undecimūq; Magnum, secundū Nomen suū. Æquavit enimvero undequēque amplitudinē, Majestatemque Nominis Ludovicus, Animo, Imperio, Religione: Animo prosperis æquē, ac adversis infractō; Imperio per omnia Pacis, Bellique ornāmēta diutissimē gesto; Religione, ab erroribus, ac vitiis acerrimē defensā, & magnis impensis, & curis studiosissimē propagatā. En vobis, Auditores, tēveluti Simulacra, quæ totū spirant Ludovicū Magnum; Magnum, inquam, Heroem, Regem Vindicem Religionis. Tria hæc ubi summatperstrinxerim, peroravero.

AC Primò quidem, Magnus ille procul dū censendus est Heros, & illustri hoc Titulo assensu omnium, & prædicatione decorandū qui utramq; Fortunam, velut è loco editiore spiciat; utrāq; Altior, utrāque Major: qui que à secunda efferatur, neque frangatur adversā; in altera Moderatus; in altera Fortis; utrāque Magnus. Habetis, Auditores, paucis pressam imaginē Ludovici Magni: qui in mulatissima felicitate, Moderationem; in

Reliquissimis infortunis, Constantiam Heroe Maximo
dignam præ Se tulit.

Quis Illo felicior, qui diu sterili Thoro, non
sine præsentis Numinis Providentia donatus Ter-
tis, atque in sinu felicitatis exceptus, incredibili
gaudio, jamdudum anxia, atque sollicita Gallo-
rum vota cumulavit? Magni Regis Filius, Re-
gni florentissimi Hæres, iis illicò corporis, ani-
mique Dotibus instructus apparuit, quæ Regem
Cœlo delapsum, ac divinitus institutum spirā-
rent, atque omnium in se amorem, veneratio-
nem, admirationemque converterent. Quin-
quennis Puer, Rex inauguratus, regna omnia præ
Se tulit præter ætatem, cujus accessu eâ felicitā-
te Regnum amplissimum, cum diuturno anno-
rum, gestorumque curriculo administravit; ut
non Gallia tantum nodò, sed Europa, sed Orbis
terrarum, insuetis plausibus, & gratulationibus
personaret. Quàm multa, quàm magna, quàm
ardua, exterorum etiam beneficio Populorum,
Regno suo major Ludovicus suscepit, atque ad
felicissimum exitum, finemque perduxit? Hinc
adeò omnia longè, latèque impleverat Fara
Magnitudinis suæ; ut ab extremis usque Terra-
rum plagis, tot venerabundos in Oratoribus suis
Reges acciverit, novi Salomonis visendi studiò
succensos.

Quid Felicitatem bellicam memorem? Quis
captas Urbes, Arcesque recenseat? Quis partas

Terrâ; Marique Victórias? atque eâ vincendi
celeritate; ut Inimicorum Terror, atque Oros
Prodigium diceretur: nec suorum modò, sed
exterorum, sed hostium ipsorum consensu, atque
suffragio audierit: Ludovicus Magnus! O verè,
atque omni ex parte Felix Ludovice! Felix il-
lis Natalibus; Felix corporis, Felix animi doti-
bus; Felix nobilissimo Regno; Felix opibus; Fe-
lix Potentiâ; Felix Virtutibus; Felix tot consi-
liorum tuorum Administris, quos Sapientiæ Tuæ
Alumnos ad omnem solertiâ, artemque regnan-
di formaveras, hòc etiam Sapientes, quòd Te
longè sapientissimum mirarentur, ac velut à Te
illustrata Sidera, Te Sapientiæ Solem præclârissi-
mum prædicarent; Felix exercitiis, Felix
triumphis; Felix tot fortissimis, & rei militaris
peritissimis Ducibus, à quibus Ipse Ducum præ-
stantissimus habereris; Felix denique amore,
cultuque Populorum, Exterorum plausu, ac ob-
sequio, Inimicorum metu, ac reverentiâ, Orbis
totius admiratione, ac laudibus! Ecquid est,
Auditores, quòd tantæ Felicitati addi possit? Est
enimverò: si eam ipsam ad omnem æternitatem
propagatam, exaggeratam in posteris videat. Vi-
dit ad felicitatis suæ cumulum Ludovicus. Vidit
Liberos, ac Nepotes, ad quartam usque seriem
Posteritatis exortos, à quibus Pater, Avus, Proa-
vus salutaretur. Quid mortali optabilius con-
tingere, quid Regi cumulatiùs potest, quàm
suam

suam quodammodo immortalitatem in Posteris suis intueri, nec præsentis tantummodò, sed futuræ etiam gloriæ incrementa prospicere, & prægustare?

Jamverò Quem Se Ludovicus in tam prosperis rebus exhibuit? Num Ille omni ex parte obsecundantis fortunæ impetu abripi, aut amplioris semper Imperii fastigiò efferri se passus est? Immo verò quò felicior, eò melior, augustiorem Humanitate, ac Moderatione; quàm Dignitate, ac felicitate Se præbuit. Cum Homine major quodammodò haberetur: hoc magis ex æquo cum hominibus sibi agendum ducebat. Eâ Benignitate cum suis versari gaudebat, ita ingentiam, & divinum quid spirantem temperare Majestatem; ut Rex, & Princeps non nisi Humanitate ipsa, ac Munificentiâ dignosceretur. Patebat omnibus aditus ad Regias Ædes: Liberum erat unicuique Regem invisere, alloqui: Liberum erat, & conqueri. Et quamquàm nunquam magis iniquum sit, de eo Principe queri, quàm de quo magis licet; incredibili tamen animi moderatione, ac magnitudine procaces interdum querimonias mitissimus Princeps ferebat; Nec ferebat modò, sed comis excipiebat, ac libens: ut omnibus potestatem expostulandi faceret: & causas, quantum humana conditio, quantum sors Regum pateretur, adimeret. Licebat miseris civibus, suas deprecari calamitates:

gregariis militibus, sua ostentare vulnera: quibus amantissimus Princeps indolere consueverat: & in aliena calamitate, ut ait Quintilianus, sui ipsius miserebatur. Præclarum istud moderati, atque ingentis Animi argumentum: Quod se hominem cogitet, qui hominibus imperat: Seque obnoxium calamitatibus putet; qui obnoxiam sibi Felicitatem intuetur.

Jam felices bellorum eventus, quâ Moderatione excipiebat? Non insolitis, non impotentibus efferri gaudiis: Gratulationes, triumphos, ac plausus constantissimè deirectare. Nihil sibi gloriæ vertere: partem militibus, partem Ducibus, omnia Moderatori Regum, Regnorumque Deo adscribere, Eique accepta referre, & sacris solemnibus celebrare: Adeo, ut Ludovicus vinceret, & Exercituum Dominus triumpharet. Noverat nimirum Vir sapiens rerum humanarum vices. Noverat, fluxam, atque evanidam esse fortunæ assentantis auram, nec mendacibus ejusdem illecebris, aut instabili ingenio, fiduciam cordati hominis niti posse. Juvat hic Julii Cæsaris meminisse, qui mediâ hyeme, atque æstuante ventis Mari, exiguæ se committens naviculæ, ut immensum penè tractum aquarum trajiceret: cum præsentis periculi metu exanimem Nauclerum videret: *Quid times?* inquit, *fortunam Cæsaris vehis.* O vocem tanto Viro indignam! Adeone ignorabat Fortunæ inconstantiam,

tiam, atque irati Maris indolem, non tam plebejis naufragiis, quàm regalibus superbientem! Quàm suâ Ipse mergi fortunâ meruerat, quàm tam superbè abutebatur. Atqui Ludovicus nunquam fortunæ suæ confusus, quidquam temerè aggressus est: Omnia maturè, ac sapienter molienda arbitrabatur: atque in tam diuturno rerum secundarum cursu, semper sibi incipiendum, semper sibi promerendam, faciendamque, quâ fruebatur, prosperitatem putavit. Quid, quòd penè incredibili sibi imperantis animi documento, suam Ipse novit seriem, atque curriculum Victiciarum, studio Pacis abrumpere.

Prodit hoc. Ludovice, Magnitudinem tuam, quòd tam ingentem Fortunam æquò animò tuleris, nec in superbiam, quæ depressio est animi, cupiditati gloriæ ferviliter obsequentis, Te inaniter effexi permiseris: Sed felicitate Tua, licet maximâ, Major Ipse, parem illi moderationem objeceris. Verumtamen unam dumtaxat, eamque minùs præcipuam id prodit Tuæ Magnitudinis laudem. Qui obsequentem, blandientemq, fortunam, irretortis penè dixerim oculis excepisti, quærendum jam superest, num etiam adversantem, ac sævientem invictus, ac serenus exceperis. Magnum est Felicitati moderationem, Majus opponere calamitati. Constantiam. Idcirco Supremi Numinis Providentia, læta sæpe tristibus, prospera adversis intexuit: Ut in

hac vicissitudine, & conflictu rerum totus extares.

Age jam, Ludovice, Constantiâ quâ valeas, profer. En Tibi Victoriâ, quæ Tuis jamdudum addicta Vexillis, Tuis oppignorata impendiis, Tibi mancipata videbatur; En deficientem, rebellantem, ad hostium Castra fugientem intueri. Vidit Ludovicus. At quem admodum vidit? Non secus, ac viderat obsequentem. Eodem vultu nuncia cladum, ac prius Victoriarum exceptit: Eâdem animi tranquillitate captas Urbes audiebat quâ capere ante consueverat. In victo scilicet animo, cum adversâ fortunâ, sibi luctandum putavit. Cum præliis victus est, Constantia loco Victoriæ stetit: ac dubii locum fecit; gloriosior ne vicerit, an vinceretur! Macte hâc Virtutis gloriâ. Heros præstan in me, atque eâdem constantiâ perfer, savius adversantem fortunam, seu potius Providentiam Numinis, Virtutes Tuas exercentem severius, gloriosius efferentem. Jam propius accedit Calamitas: Regiam obsidet Domum: & quas laureatis hæctenus militibus clades intulerat, jam infert Tuis.

Delphinum, Charissimum Filium, Cui regalibus, ac sanctissimis moribus instituendo, tantum Regiæ curæ, ac sollicitudinis impenderas, quem Tuis inhaerentem vestigiis, Tuas referentem Virtutes, Tibi, Galliæ, Romæ, ac Cœlo meritò gratulâ-

1) tulabaris, quem Successorem tuum, Regno dignissimum, atque Orbis ornamentum formaveras, Amantissime Genitor, immaturâ morte Tibi præreptum vidisti. O dignam vel tuis lacrymis calamitatem! Hoc tamen dolori Tuo solatium esto. En Tibi Delphinum alterum, Burgundiæ Ducem, quem Gallia novam spem Imperii nascentem vocaverat, Filium non imparem Patri, Nepotem non absimilem Tibi, Mentis amplitudine, Regnô amplissimô parem, & quod caput est, etiam morum integritate, Pietate, ac Sanctitate fulgentem, ut Divum alterum Ludovicum Galliæ destinet, Ecclesiæ spondeat, Cœlo polliceatur. Sed ô magni luctus breve solatium! Hunc ipsum Calamitas petit, ac perimit: In ipso Juventutis flore, Galliæ rapit, ac Tibi: & nondum obductam gravissimi, quod acceperas, vulneris cicatricem graviori vulnere cumulat, aggerat funeri funus, dolore dolorem exasperat. Delphinum saltem Tertium Britanniæ Ducem, speciosissimum Puerum, qui totum spirat Genitorem, qui Avum ipsum, immô & Augustissimum Proavum oris habitu refert, Hunc saltem servate, Superi, ne Regiæ, & Regni spem reliquam dolenti Galliæ, & mærenti Ludovico mors rapiat. Proh irrita vota! Hunc quoque mors rapuit. Ne huic quidem tenerrimo Flori perpercit: Hanc quoque innocentissimam Victimam crudelitati suæ immolavit. Num tandem

fatis? Nondum ne funereus iste calamitatis Turbo defæviit? Utinam fatis! Bituricensem Ducem, quem ad Augustæ Domûs felicitatem natum interpretata est Gallia, Hunc etiam Mors in partem sævillimæ cladis vocavit. Hoc etiam, in Borboniæ Domus Cælo, lucidissimum Sidus extinxit. Quid memorem, quod in primo illo furentis tempestatis æstu, Mariam Adelaidem Sabaudam, Burgundi Uxorem lectissimam, quam ob eximias, tum Naturæ, tum Virtutis dotis, Tibi commendatam, Ludovice, uti Filiam charissimam diligebas, ac senectutis Tuæ solatium appellare consueveras, Eam ipsam, ætate florentem, & fecunditatis suæ fructu nequicquam lætantem, vix dato, inter Conjuges, & Filios tot Funerum spatio, uno propemodum ictu, Mors cæca, Mors impacata peremerat? O deplorandam in sæcula Funerum seriem!

At qui Tuus doloris sensus, Ludovice, cum tam funestam procellam exciperes, quæ tot florentissimaqua Tuæ Regiæ stirpis genimina excidit, atque eam, quam in Posteris Tuis ominabare, felicitatem tam brevi tempore evertit? Cum Te præsentem tot, ac tam lugendis Tuorum funeribus sisteres? Cum Galliæ totius moerorem, ac luctum, quæ cladem Tuorum, atque Orbitatem Tuam, suamque dolebat, lugebatq; intuereris? Magnum Constantiæ Tuæ argumentum, quod penè senio confectus, vim tamen doloris

loris sustinebas, totque infixis cordi vulneribus, quorum recens semper acerbitas, nondum obdormitam veteram cicatricem refricabat, Te tamen superstitem, incolumemque servaveris. Majus, & plusquam heroicæ argumentum Constantiæ, quod Te tam invictum, & calamitate Tua majorem exhibueris, ut tristissima hæc, funestissimaque Tempestas animum Tuum, non dicam obnubere aut perturbare, sed ne occupare quidem potuerit, quo minus intercæ consiliis pro more præesses, Regni negotia expedires, acceptas à militibus Tuis, quæ eo ipso tempore nunciabantur, clades redimeres, iis quæ timebantur, occurreres, omnia deniq; eadem mentis tranquillitate, & præsentia transigeres, quâ prius uti solebas, cum omnia Tibi pro voto cederent, & prospero flatu Fortuna velificaretur? Aut ego vehementer fallor, aut parem animi Constantiam, apud omnem retro antiquitatem frustra quæremus.

Unum superest, Ludovice, argumentum Virtutis, ac Magnitudinis Tuæ. Num eandem, tot calamitatum Victtricem animi firmitatem in supremo Vitæ discrimine præstitisti? At non eandem, sed majorem enimverò, sed maximam, supra quàm dici possit, exhibuit. Adeò ut Nemo (Tua hic testor, Clemens Pontifex Maximæ, oracula potius quàm verba) ut nemo ex veteris Philosophiæ Sectatoribus, tam magnificè contemp-
prum

ptum mortis decantaverit in Scholis, quàm Ille fortiter prætulit in arena. Cum in sinu optatissimæ Pacis dies felicissimos duceret, morbo corripitur, qui diem Illi supremum denunciat. Quâ serenitate, ac tranquillitate fatale nuncium, quo vitâ, Regnoque excedere jubebatur, excepit? Quo imperterritæ mentis, ac Vultûs habitu, mortem foribus incubantem non paucos dies sustinuit? Quâ Pietatis constantiâ Divinis rebus, sibi que ad immortalitatem comparando animum intendit? Quâ Providentiâ, & curâ felicitati Populorum, ac novo Regi instituendo consuluit? Adeo ut viribus integer, vel propediem moriturus, videretur! Quid, quod Eos, qui tanto vel doloris, vel constantiæ spectaculo aderant, cum à lacrymis temperare non possent, unus qui lugeretur, Ludovicus, solari lugentes nitebatur: quin vel ipsos redarguens: *Itane, inquit, me immortalem credidistis? O voces, quod mortalitatis immemores admoneret, immortalitati consecrandas!*

Prodeat hic Alexander, qui acceptum vulnus mortalitatis suæ argumentum interpretanti Philosopho ita succensuit, ut reum mortis damnaverit. Hic cine Magnus Ille, quod adeo jactabunda superbit antiquitas? Non ego Illum Heroibus adnumerem, qui fortunâ superbiat, sed Maqui qui vulgus hominum Virtute transcendat: Hæc cine tandem magna Virtus, intantum efferri fe-

licita-

licitate, ut Tibi immortalis videare? Intantum
vinci calamitate, ut mortalitati Tuæ irascare?
Quàm verè Magnus, Ludovice, Qui mortalita-
tis Tuæ perpetuò memor, ac patiens, immorta-
litem in terris Tibi non pateris, nec arrogan-
ter tribui, nec amanter optari! *Itane me credidisti*
immortalem? Hæc tandem vera, Hæc magna, Hæc
maxima Virtus, ac Tua, Ludovice: quòd à neu-
tra Victus fortuna immò utriusque Victor, alte-
rius illecebras excelſitate animi supergreſſus, ne
Tibi præſſet, evaſiſti, alterius odia. Conſtantiâ
animi ſuperans, ut Tibi ſuccumberet, còégifti.
Adeò ut in utraque ſuperanda Heroem te unde-
quaq. Maximum comprobaveris.

Haclenùs Ludovici laudes, nunc Regis acci-
pite. Regem Maximum ſeſe Pace, Belloque
probavit. Quot enim in Heroico Principe pa-
cata Virtutes? Quo ſplendore cultuque fulſe-
runt? Quis ſatis Regiam verè Prudentiam demi-
retur? ſive delectos publicæ gerendæ rei Admi-
niſtros. quos ſingula vix ederent ſæcula, contem-
pletur: ſive res ſapientiſſimè diſpoſitas, ſive eaſ-
dem fortiter ad exitum, coronidemque perdu-
ctas. Quis integerrimam Æquitatem, dum aut
publica Munera partiretur, aut Virtuti erogaret
Præmia aut Supplicia criminibus irrogaret? Quis
Magnificentiam Regi Potentiſſimo parem, ſeu
Reges avito Regno extorres exciperet? ſeu bo-
nas Artes Donariis ampliſſimis ad omnem laudem
excita-

excitaret? seu angustas Moles, mansuraque in omnem ætatem Monumenta conderet? seu tandem, Opere, vel Cæsaribus frustra tentato, Maria ipsa committeret?

Quid verò bellicas laudes aggrediar, quæ in omnium ore, ac prædicatione versantur? Quæ in Eo rei militaris Scientia, quam suis Ipse experimentis didicit, suis Monumentis edocuit, inventis denique suis ad summam gloriam, culmenque perduxit? Quàm mira Fortitudo! Quàm invicta Constantia! Quàm Temperantia singularis! Quanta demùm Authoritas, quàmque pervagata apud Suos, apud Exteros, apud Hostes!

En vobis, Auditores, paucis expressum, alterum Orationis Caput, uberius exponendum nisi omnem copiam, facultatemque dicendi, argumenti Magnitudo superaret. Pace itaque Tuâ, Ludovice, tot Regias laudes prætereo, quæ Te Regem Maximum prædicant: Majus Tibi gloriæ additamentum fore ratus, si laudator sileat, quàm si jejune, parcèque laudet: Cum præsertim sciam minùs Te delectari in præsentia, quòd Rex Magnus, quàm quòd Magnus Vindex Assessorque Religionis extiteris. Tertiam hanc Orationis meæ partem, quæ præcipuè hunc locum decet, expediam.

Reges, ac Principes, qui Dei vices in Terris gerunt, & Vicariam præ se ferunt Supremi Numinis Majestatem, ejusdem honori tuendo, pro-

moven-

movendoque, omnem fas est, quam ab Eo accipere Potestatem, & Authoritatem impendant. Præcipuum hoc Christiani Principis munus. Quid enim vel ad Populorum felicitatem accommodatius, vel ad Imperii securitatem utilius, vel ad nominis immortalitatem excogitari gloriosius possit? Hic tandem veræ Magnitudinis apex: Hæc summa Virtutis: Hoc veræ laudis fastigium: Si magnum Te Religionis vindicem præstes. Præstitere profectò Gloriosissimi Galliarum Reges: atque ita præstitere; ut Christianissimi appellari Pontificiis Literis promeruerint. Præstitit quàm qui maximè Ludovicus Quartus-decimus: atque ita præstitit: ut hæreditarium nomen sibi peculiare, ac proprium effecerit. Huc enim præcipuè magnæ mentis curas, cogitationesque convertit: ut Religionem Catholicam tueretur acerrimè, ac pro viribus promoveret. Atque illud in primis cordi fuit: ut toto quàm latè patet Regno, ab Errorum, Vitiolorumque colluvie, fartam eam, rectamque servaret.

Hinc Calvinianam Hæresim, nescio quâ temporum calamitate, in Gallia natam, atque innutritam, atque eò audaciæ provectam, Ut in rebellem quandam Rempublicam in Regni gremio coalescere, Tempia erigere, Arces comminire, ac Trium sublequentium Regum conatus eludere visa sit: Unus tandem Ludovicus Magnus

gnus, Religionis amore inflammatus, totò Regno) Re
expulit, eliminavit, extinxit. Id vero quàm vi
fortiter præstitit! quàm sapienter! quàm feli- le
citer! u

Videbat feralis Hydræ vires, quæ Majoribus lii
suis metum, ac penè vincendi desperationem in- te
jecerant. Aggreditur. Intelligebat, in Regia ju
tandem Potestatis, atque Erarii detrimentum re- ri
dundare, si tot Cives è Regno proscriberet. Pro- in
scribit. Noverat, desperatos Exules, acriores in flo
se aliquando, ac validiores hostes futuros, Exe- ph
rorum vires in Galliæ Regnum concitatu- tu
ros Concitent, tumultuentur, insaniant. Acuebant qu
ista, non revocabant Magnum illum utilitatis ip
cujusque, atque dispendii contemptorem ani- ni
mum, cui nihil videbatur angustius, nihil era- ph
optatius, quàm Se, suaque omnia, avitæ Reli- ta
gionis incolumitati, & gloriæ devovere. mi

Sed illam ego præcipuè miror Sapientiam tic
quæ industriam omnem, & curam, omnemque tal
hominum conditionem complexa: accommoda- vi
ta singulis consilia, ac mandata expediebat: et qu
Severitatis, & Clementiæ temperamentò; un- fer
nunc amore Principis, ac spe beneficiorum ille- la
ctos, nunc Authoritatis reverentiâ, aut metu- gn
pœnarum adductos, ad Religionis Castra, à qui- pe
bus defecerant, sponte suâ, ac volentes, revert- Te
quodammodò cogeret, ac felici quadam necessi- Ti
tate, beatos esse compelleret. Illam sequutu

Regi-

Regiminis normam, quâ Supremi Numinis Providentia nostros feliciter expugnare animos sollet: *attingens*, ut sacer Codex loquitur, à *fine usque ad finem fortiter, & disponens omnia suaviter.*

His optimis artibus, sapientissimisque consiliis, adeò feliciter confecta res est, Ut vicies centena Calvinianorum millia, ab impiæ Hæreseos jugo ad Catholicæ Religionis libertatem redierint. Pulchrum hoc genus Victoriæ, quæ non interneccione hostium, sed eorum incolumitate florescit: & victos ipsos Victores fecit! Triumphum lætum, ac Nobilem, quem non in servitutem redacti hostes, sed in libertatem asserti sequuntur, nec gemitibus inimicorum, sed vel ipsorum plausibus personat. Dignum Christianissimo Rege, dignum Ludovico Magno triumphum, cui nullâ unquam allatura sit finem ætas, ac tota plaudet Æternitas. Tot hominum millia, quos ab errore ad veritatem, à superstitione ad Fidem revocasti, atque in spem immortalis Beatitatis, quâ ceciderant, erexisti. Ludovice, non secus, ac dum in Terris degeres, eam quam per Te prægustabant felicitatem, Tibi referebant acceptam, Tibique veris, ac summis laudibus gratulabantur, In Cœlesti pariter Regno, ubi tantæ Virtutis fructum uberrimum capere Te non immeritò credimus, immortalem Te auspice, ac Duce, gloriam consequuti, eam Tibi acceptam, referre, Tibique æternis plausibus

bus gratulari non desinent, ad Tuæ cumulum Beatitatis. Hanc itaque, quam adeptus es laude n, felicissimamque Victoriam Tuis omnibus bellicis laudibus jure antepones. Ille enim Fortitudinem Tuam, quæ magna est Virtus ostentant: Hæc Religionis intensissimum studium, atque amorem. Virtutum omnium præstantissimam, Divinissimamque deprædicat. Illæ Te Maximum Ducem proclamant: Hæc, quod est multò præstantius, Maximum Te Religionis Vindicem probat. Nonne vel hæc unâ parâ Victoriâ, primus Ipse appellari Christianissimus merebare?

Sed non hoc tantum nomine præclarum adeò cognomentum, nec semel tantummodò, Iterum, ac sæpè, ac semper magis, hoc etiam titulo, promeruisse, quod novis avertendis erroribus, perpetuò vigilem, ac sollicitam curam impenderis, atque iisdem Regiæ Potestatis gladiò stirpibus exscindendis, ad extremum usque spiritum adlaboraveris: Nec satis duxeris Orthodoxam Fidem ab Hereles monstribus vindicare, nisi etiam ab infestis Sanctitati vitiis, ac moribus expurgares.

Olim in Gallia duo potissimum Vicia inoleverant: Effrenis blasphemandi Licentia, & singularium Certaminum furor, utrumque Religioni infensissimum. Alterum Summi Numinis Majestatem rectâ petit, traducit Nomen, Dignitatem-

tatemque contemnit: Alterum Vindictæ Idololum colit, eique nobilium Victimarum sanguine, & clade litat. Primum apud milites præcipuè invaluerat, quibus quædam videbatur feritatis jactantia, quâ se metuendos offerrent, si Deum ipsum procacibus linguis contemnere auderent. Alterum verò Gallicæ Nobilitati commune erat, quæ velut avitæ gloriæ insigne quoddam venditabat, libidinem ulciscendi: atque honoris culmen se assequutam opinabatur, si ad depellendam injuriam, vitam in discrimen adduceret, ac miserrimè liberalis, etiam profunderet.

Ferer hos mores Religiosissimus Princeps? Vix legitimam ætatem adeptus Regale solium conscendit, statim utrumque deterrimum vitium suis petendum fulminibus censuit. Ardens, & erectus ad sacrilegam ejusmodi licentiam comprimendam, se ipso augustior, totusque ad Regiam Majestatem compositus, ex editiore loco Edictum duplex pronunciavit: Alterum, quo contumeliosa in Deum verba execratus, tanti criminis reos, à Majoribus suis damnatos, iterum, & gravioribus pœnis addixit: Alterum, quo singularia certamina detestatus, eos, qui inirent, bonis omnibus mulctandos, mortis supplicio plectendos, atque infames perpetuò habendos decrevit.

O Regnandi primordia Christianissimo Rege

H

dignis

dignissima! Quàm bene, Religiosissime Princeps, Authoritatem Regiam statim Deo acceptam refers, totamque ad ejus vindicandas injurias, & reverentiam augendam, convertis! du Qui Populorum sensus, cum viderent, hanc primam, atque præcipuam à Te susceptam Christianæ Religionis, & Charitatis curam! Hòc se Te magis reverebantur, quòd non Tibi, sed Deo coram reverentiam præstari juberet. & cogeres. Quam Bonorum Latitia? Quæ gratulationes? Cum intelligerent, tam festinato beneficio, à Te servatos incolumes tot nobilissimos Cives, quos Zefana illa impiorum certaminum conditio, Vivilo civili bello deterior, Patriæ, ac Vitæ eripere Ha crudeliter casos consueverat. Qui denique Pri Impiorum merus, ac desperatio? Cum Te inexorabilem Vindicem experirentur, atque omnem sibi ademptam spem impunitatis viderent.

Ut compressa illicò obmutuit blasphemandi Qu licentia! Ut statim deferbuit singularium certaminum furor! Tui reverentia effecit; ut dia blasphema in Deum ora improbissimi homines, to premerent, ut splendidis invicem odiis, ac de-erro coro, ut putabant, saviendi astu Nobilestem-ue perarent. Aberrare se, ac falli tandem sensere, qui legem credebant, injurias persequi, at-vere que ad eas vindicandas, vanâ quâdam honoris specie rapiebantur. Improbati ab omnibus Pas-
cœpit,

rin-cepit, quod Ipse improbabas; Infames cense-
re, quos Ipse censebas. Sua cuique Vita in pretio
est: Nemo illam vindictæ Idolo, sed Patriæ
artibus! dumtaxat, aut Religioni immolandam existimat.
pri-Nunc tandem Matres, suæ fœcunditatis fructu
Christi lætantur, cum sciant; Uni Tibi, ac Religioni
Hoc servari, quos Illæ genuerint. Tam feliciter
Deo ceptis constanter insiste, Princeps Christianissi-
me, aliaque. si quæ supersunt Vitia, eadem, ut
cum mereris, felicitate persequere.

ser. Fecit Perpetuus Religionis Vindex. Quod
quos Zelô Domus Dei succensus, Aedium sacrarum
tio, Violatoribus severissimè puniendis instabat?
pere Hanc Unam ob causam irascebatur mitissimus
que Princeps: Et qui tam facile injurias, quæ sibi
in-inferebantur, negligere, Magnanimæ Indolis
e o-documento, consueverat, exorari nunquam
ide-potuit, ut iis, quæ sacris Aedibus inferebantur,
ignosceret, & aliquando inferentibus parceret.
andi Quid memorem exterminata Veneficia, Luxum
cer-côercitum, castigatam Intemperantiam, Desi-
ut diam proscriptam? Quid plura? Nihil à Tan-
ines-to Vindice omissum, ut Religionem, non ab-
de-erroribus tantum, sed etiam à Vitiis sinceram
em-tueretur. Sed nihil etiam prætermisum, ut
in-se-ejus amorem, & cultum pro viribus promo-
at-veret.

oris Huc illa spectat singularis Providentia in
ibus Pastoribus optimis deligendis, eorumque au-

gendo, ditandoque Censu: quò impensius sanctioris Doctrinæ pabulo, Gregem Sibi creditum palcerent, atq̃, ad omnem virtutem informarent. Huc Tempia trecenta munifico sumptu à fundamentis erecta. Huc invalidis militibus Hospitium magnificentissimè extructum. Ubi Religione magistrâ secum ipsi decertant sanctioribus præliis assuescunt, ac triumpho beatissimos, atque immortales referrent. Huc Sancyriana Domus, ubi Nobiles Puellæ trecentas Regiis impensis perpetuò alerentur ac Religionis alumnae ad ejus normam educarentur. Huc tandem assiduum illud, atque impensissimum studium, ut Regiam Domum religiosissimis moribus institueret; ac seipsam præberet omnium Virtutum exemplar: Cur sciret ad Regiæ Familiæ normam, cæteras dirigî, atque componi, omnesq̃, propemodum Principis moribus vivere.

Sed majore æstuabat promovendæ Religionis ardore, quàm qui posset, amplissimis licet Regni sui limitibus contineri. In Anglia, in Hollandia, in Græcia, Syria, Persia, Armenia, India, Æthiopia, toto denique Orbe terrarum Catholicæ Religionis amorem, & cultum, quæ officiis, quæ opibus, quæ consilio, quæ Patrocinio, promovere pro viribus, atque amplificari contendit. Quàm multa hîc, ne in immensum excurram, prætereunda mihi, aut differenda sunt,


sunt, quæ integram sibi Panegyrim, vel singula vendicarent?

Hoc tantum dicam, Ludovice Rex Christianissime. Tanto huic, ac penè immenso, quo flagrabas, tuendæ, ac promovendæ Religionis studio, referre acceptam debes eam, quam in Terris adeptus es, felicitatem, beatissimamq; quâ frueris, atq; æternum frueris in Cælo: ubi Religiosissimum, ac verè Christianissimum Regem, Maximum Religionis Vindicem regnare confidimus.

Illud Tibi de Cælo providendum superest, ut Ludovicus XV. Successor Tuus, Tuis vestigiis inhæreat, Tuas Virtutes referat, Tuis adolescat exemplis: Ut Magni Rectoris curæ respondeat: Ut Ejus etiam præclarissimas Dotes, Regiæ administrationis Prudentiam, Bellicæ Laudis præstantiam, omnium Artium scientiam, cæterasque Virtutes amplissimas sedulâ imitatione assequatur. Adeò ut, potiori, si fieri potest, jure, Ipse etiam Ludovicus XV. prædicari aliquando Heros Magnus, Rex Magnus, Vindex

Magnus Religionis verè Christianissimus possit.

D I X I.



BIBLIOTHE. UNIV.



JACOBUS

us Hieronymus
non Magdalenae?

Krause Beniamin: Epithalamium in festo
matrimonii nuptialium Hieron. Gracii cum

Epith.

Biblioteka Jagiellońska



stdr0025454

